

Oops...!! **مُحِبَّة**

...Oopsمُحَجَّبَةٌ...

رشا أبو السعود

تصميم الغلاف : ليلى خفاجة (Direct Studio- Lebanon)

رقم الإيداع : ٢٠١١/٢٢٨٦١

I.S.B.N: ٩٧٨- ٩٧٧- ٤٨٨- ٠٨٣- ٤

دار اكتب للنشر والتوزيع



الإدارة : ١٠ ش عبد الهادي الطحان من ش الشيخ منصور،

المرج الغربية، القاهرة .

المدير العام : يحيى هاشم

هاتف : ٠١١١٠٦٢٢١٠٣ - ٠١١٤٧٦٣٣٢٦٨

E – mail : daroktab1@yahoo.com

دار اكتب للنشر والتوزيع : Facebook

الطبعة الأولى ، ٢٠١٣ م

جميع الحقوق محفوظة ©


دار اكتب للنشر والتوزيع

مُحَبَّة!!...Oops

رشا أبو السعود



دار اكتب للنشر والتوزيع



إهداء

وأنا في أولى إعدادي .. لما مرضت وقعدت من المدرسة في السرير أسبوعين ..
لما طلعتي على التسريحة عشان تطولي أعلى رف في المكتبة إللي في أوضتك .. لما
إديتيني رواية "لا تطفى الشمس" لإحسان عبد القدوس .. لما شفت القصة بعيني
كأنها حقيقة .. حلمت .. حلمت جزء من حلمك إنتِ ..

أهديك حلمي يا أمي ..

وإلى من أنا قطعة منه .. الفنان والدى

إهداء

كانت ليلة شتاء وشوارع وسط البلد كانت بتلمع من المطر.. جيتلك وأنا
حاسة إن الدنيا بتضيق عليّ وقلبي بيتخنق.. يومها بصيتلي بنظرة حنينة جداً..
وبصوت هادىء .. واثق .. وعدتي: "صاحبي خوفك.. ونجاحك حبيبي مضمون"

..

أهديكى إيماني بكِ وبوعدك يا د/ ناهد ..

إهداء

لما بخصنكوا بشوف بعيني سبب وجودى...بتنفسكوا كل لحظة...قلبي اتخلق

عشان يشيل حبكم ويدبدب بيبكم

اهديكم شغفى يا كُـل شغفى...

إحلموا...

طيروا...

إحيوا...

حسن يا أجمل حسنانى...

جُمانة يا جوهرة حياتى...

جینز مقطع

كان فـمار يوم من أيام صيف سنة ٩١ .. نزلت من أوضتي في أحد فنادق الإسكندرية ذي الخمس نجوم، وأنا .. أتمختر على طريقة جون ترافولتا في فيلم "حُمى ليلة السبت" .. ومنظري كالتالي:

شعري إلهي أصلاً ناعم وجميل موءود تحت أظنان من الجيل والموس في محاولة مستميتة لجعله منكوش وهائش وضاربة فيه الكهرباء ..

نضارة راي بان مربعة لزوم تقليد عذراء البوب مادونا وده مبالغة شديدة أنا عارفة ..

جيز ماركة ليفايز أصلي اشتراهولي بابا قبلها بيوم ودي كانت أول لبسة بعد ما قضيت معاه المساء والسهرة بشرح فيه بموس طلبته مخصوص من الرووم سيرفيس والحمد لله إنهم مابلغوش أمن الفندق .. والنتيجة : تنسيل حاد من عند منطقة الركبة .. وعشان قلبي حنين ومحبتش أجرحه أكثر من كده سييت كام فتلة واقعين منه ..

باندانة أمريكاني فوشيا مربوطة حول المعصم .. ولأ، مكنش واجعني.

مُلَمع شفايف بطعم التووت .. أيوأ .. مفيش مكياج ولا بطيخ .. حيث إن الوالد كان رافض تماماً إني أحط حاجة في وشي بالرغم من إني كنت لسه ناجحة في الثانوية العامة وعلى وش جامعة .. اللحظة إلهي كنت مستياها طول عمري .. ما أنا كنت كل ما أقول لماما : عايزة أحط مانيكور زيك ، تقوللي : لما تكبري .. أسألها : إمتي يعني؟ .. تقوللي : لما تدخلني الجامعة .. أتلامض وأقول: طيب والزوج يا ماما .. تقوللي : برضه لما تدخلني الجامعة ..

وأدبني داخله الجامعة .. ولا حياة لمن تُنادي .. وبابا بقي أسلوب إقناعه جميل الحقيقة .. برق ورعد ويصلي بصة ألاقى الدنيا اسودت في وشي .. إلى جانب خصام وحرمان من المصروف لمدة شهر إذا لم شبح لون في بقي حتى لو في البيت .. مش حانسي صوته الجهورى وهو يقول:

- يا بنتى افهمى .. بيوحشك .. وانتِ حلوة ف ليه توحشي نفسك؟!

- يا بابا أنا بس بلعب .. مش أنا في البيت؟!

- انتِ حتملي زي الفنانين؟ (هاهاها .. حتمرفوا بضحك ليه بس بعد شوية)

- لا يا بابا فنانين إيه بس .. مش أنا كبرت .. عادي يعني

- يووووه .. اسمعي الكلام وشيلي القرف ده فوراً

- حاضر

مكشرة مش عارفة ليه .. وكان التناكة والبوز شياكة وكاركتر بقي وكده .. واتبسطن قوي لما قابلنا أصحاب لبابا وافتكروني أمريكانية .. يومها ركبنا العربية معاهم وروحنا الجزيرة* .. ودى يمكن تكون الصورة الوحيدة إللي دائماً بيتيجي في بالي لما بفتكر نفسي زمان .. كنسخة تكاد تكون طبق الأصل من الخواجات .. وليس مُلفت .. مش عريان بس مُلفت لأنه غريب ..

يعني مثلاً بنطلون برجل طويلة ورجل قصيرة .. جيبة قصيرة تحتها بنطلون فوقها تي شيرت وعليه حمالات رجالي لوها فسفورى .. كده يعني .. مش بلياتشو .. لأ لأ مش قوي كده .. كان لبسي كله وارد الخارج بس زي ما تقولوا كده ذوقي مطرقة .. أو أنا إللي كنت مطرقة ..

عمري ما خرجت من بيتنا لابسة حاجة عريانة ولا قصيرة.. وطبعاً المايوة مش محسوب كلبس عريان .. أيواً .. المايوه هو اللبس المناسب للبحر .. وبالتالي مش عيب .. ده مقاييس الزمن ومقاييس المجتمع وقتها .. طبعاً أيام زمان لو كان حد فكر بس يعمل شواطئ للمحجبات كان زمانة مخلل في المعتقل ومتهم بقلب نظام الحكم ..

متهيألي الناس زمان كانت مكسلة تفكر في مقاييسها وبالتالي ما لاحظوش التناقض .. أو الشعب كان مطمئن بقي .. الله أعلم.

* جزيرة نلسون تبعد عن الإسكندرية نصف ساعة بالبنش.. زي شاطئ خاص صغير بعيد عن الناس وكانت أيامها مفتوحة للشعب بس حالياً قررت الدولة تاخذها للقوات المسلحة ..
بجملت!

الزوال

عارفين المرحلة دي أكيد .. فترة كده كان كل ما حد يقابل حد يسأله : وانت كنت فين ساعة الزلزال .. أيوأ بتاع ٩٢ ده .. والناس تقعد تستعيد ذكرياتها المضحكة مع الزلزال .. وتبقى مباراة بقي .. مين حيقول حاجة أجهد .. إللي كان في الحمام وجري بلبوص وإللي كانت راكبة ميكروباص ومحسيتش أصلاً لأنها إفتكرت الهزة من المطبات وده تفسير منطقي بُناء على واقع نُقر الشارع المصرى .. وإللي كان في البلكونة وعملها على نفسه من الحُصّة ..

أنا فاكرة برضه كنت فين ويعمل إيه يومها .. كنت في الصالة بتفرج ع التليفزيون مع ماما ولما البيت إتمرجح بينا نزلت تحت ترايبزة السفرة وقعدت أتشاهد وأدعي ربنا يرحنا .

بس الحقيقة إني لما بسمع عن الزلزال مبفكرش إلا في الحدث الكبير إللي حصل بعد الزلزال بكام يوم .

كل الناس أيامها خافت .. كل الناس فكرت في الموت .. وكل الناس قربت من ربنا ولو حتى لفترة بعد الزلزال .. وإحنا في العائلة الكريمة حصل لنا كده برضه .

بُصوا .. إحنا عائلة طيبة .. بتحب ربنا .. بس من غير تطبيق .. مفيش معاصي كبيرة .. بس كمان مفيش حجاب .. مش رفض للحجاب بس لأن ثقافة إن الحجاب من الدين كانت تايهة عن معظم الناس من جيل الستينات والسبعينات .. جيل والدتي وخالاتي وعماتي .. أيامها ولحد أول التسعينات كان في الوسط الإجتماعي إللي إحنا فيه الحجاب مُقتصر على الفلاحين والصعايدة والبسطاء

أوالسيدات من كبار السن أو أخيراً المتشدددين دينياً (يعني جماعات إسلامية .. ههشش لا حد يسمعن).

إنما بعد الزلزال أخذت اللقاءات العائلية شكل مختلف .. كُبرى خالاتي إليي كان بيتها قبلة تَجْمَعُنا العائلية، اتغيرت كثير ..

شالت التلفزيون من البيت، شالت الصور من على الحوائط، لبست طرحة بيضا، ولعت بخور، ولم ينقطع صوت شريط الدكتور عمر عبد الكافي من بيتها .. أصحابها يجوا أو قرايبها يجوا .. كله لازم يسمع عمر عبد الكافي .. وكله لازم يسكت .. وبعد الشريط ما يخلص تبدي ندوة نقاش عن كل ما هو مرعب عن عذاب الكافرين والعُصاة .. وبحث كل ما هو متعلق بالتوبة .. مكنتش بسمع كلامهم ومكنتش بسمع الشريط .. ومكنتش بقوم أمشي .. كنت با تَنَح .. بشترك في الحوارات لأني لمضة ولازم أتكلم .. بس من غير ما باخد المعاني لجوه ومن غير ما أتأثر .. وفي إحدى الزيارات كان بيتكلم الشيخ الدكتور عن عذاب القبر.

كنت لابسة جيتز وفي سنة تانية كلية ومرحة وزهقانة في نفس ذات الوقت .. ماما كانت لابسة جيتز وتي شيرت ومرحة بس مش زهقانة .. أمي اتجوزت وخلفتني وهي صغيرة قوي فكنا أشبه لأختين منّا لبنت وأمها.

اليوم ده سمعت غضب عني واتضايقت .. بعدين كنت على وشك أتخرج بأي حاجة عشان أمشي .. بس ماما أذهلتني .. عيطت كثير .. وقبل ما الشريط يخلص، قامت من مكانها ودخلت أوضة خالتي وطلعت لابسة عباية واسعة .. كانت لابساها بالمقلوب .. وكانت لابسة إيشارب وقالت : أنا اتحجبت خلاص!

كله قعد مذهول وبعدين هاتك يا ضحك وأسئلة ورغي وأنا كل إللي كان
هامني إزاي تلبس العباية بالشقلوب كده .. وبعدين جه وقت المرواح وحت تنزل
قتلها طيب اعدليها .. فضحكت وعدلتها .. لما نزلنا وركبنا العربية بصيتها جنبي
لقتها واحدة تانية ..

أول سيدة أو فتاة تتحجب في عائلتي كلها .. ماما!

ماما طول عمرها هادية ورقيقة ومحترمة ومتقفة وبتصلي وبتصوم وبتقرأ قرآن
.. بس حجاب؟؟! إللي مش شيك ده؟؟ ده في أواخر الثلاثينات ولسه صغيرة
وشيك جداً ورشيقة جداً.. ماما تتحجب؟؟!

وشجب الكثيرون واعترضوا وهاجموا وسخروا واستهجنوا وهي .. لم تتردد
يوماً .. إلى وقتنا هذا ..

أنا موقفني كان عدائي .. مش عارفة ليه ..

وبابا موقفه كان جملة جميلة قوى .. قالها : انتي طول عمرك مُحجبة .. طول
عمرِك رائعة ..

ومن يومها حاجات كتير في حياتنا اختلفت .. حاجات كتير بقت أجمل .. مش
عارفة إيه العلاقة بس ده إللي حصل

هنا وإنهاء

الناس كلها ممكن تدّبس في حاجات .. إللي يدّبس في عزومة واللي تدّبس في مشوار واللي يدّبس في خدمة .. بس أنا عشان طول عمري مميزة ومختلفة اتدّبست في خطوبة .. آه والله .. مش إني أحضر خطوبة .. ولا إني أسعى لحد في خطوبة .. نوو .. أنا بلا فخر إتدّبست إني أتخطب لواحد شخص كده إنما إبيه .. عجب!

يا ريت محدش يسألني إزاي لأنه موضوع شرحه يطول وفيه سنّة هطل ومالوش علاقة بموضوعنا قوي يعني ..

جبت سيرته ليه؟ جبت سيرته لأنني كنت مخطوبة يوم ما قابلت الأخت الفاضلة هناء .. هذه الأخت الفاضلة كانت أصغر مني بستتين وكانت جارة خالتي السابق ذكرها ..

أنا كنت قاعدة عند خالتي وفجأة دخل علينا شيء شبه الأشباح بتاعة ميكي جيب دى .. إللي بتبقى خُرمين فيهم عينين في ملاية بيضاء وبتجري ورا ميكي دائماً وبعدين لما بيواجهها بتطلع يا حد من عصابة القناع الأسود يا أحد الأشرار إللي عايزين يطفشوا ميكي من القصر المهجور .. أيوأ كنت باقرا ميكي .. عادي جداً ..

الشيء إللي دخل ده رفع قناعه لقيت بنوتة صغنة قمر اسمها هناء .. دردرشت مع خالتي وبنّت خالتي وماما شوية .. كانت للذيذة وظريفة قوي ..

أنا متكلمتش معاها بس كنت مبسوطة بيها ومش عارفة ليه .. يمكن عشان فكرة التدين عموماً طول عمرها جذابة بالنسبة لي .. ويمكن عشان الفترة دى أنا كنت بفكر جدياً في الموضوع .. جدياً بمعنى بفكر قوي مش بمعنى حائِثُفَذ .. آه عشان أبقي واضحة.

فضلت قاعدة أتفرج عليها .. أبص على الطبقات إلهي لابساها .. على شراها
وجزمتها ولون عبايتها إلهي كان لون إسهالي قميء .. وبعدين بصيت لرجليا ..
الجيز كان ضيق .. وأنا مبتلطة حبتين .. اتكسفت من رجليا .. اتكسفت من هناء
.. ولأني فقيرة من يومي وكأها قرأت أفكاره فقالت أما أهجم، لقيتها بتقول لماما
من غير ما تبصلي:

- حسيبيها كده كل الناس ولعاياذ بالله شايفين جسمها المتفسر ده؟

- ما هي لسه صغيرة يا هناء .. وبعدين مش بتلبس عريان ولا حاجة .. ده
بس الجيز عشان الجامعة وكده

- يا طنط اسمحيلي .. ما دامت بلغت الحيض لازم تغطى .. مينفعش تقبلي
إن إلهي رايح وإلهي جاي يزى بها بعينه كده.

ماما بلّمت من الكلمة .. وأنا اتجرحت .. قمت وقفت .. مشيت دخلت
البلكونة .. دمّعت من الوجع .. بصيت تحت لقيت الأخ تديسة مستيني في
العربة .. قلت لماما حستناكي في العربة ونزلتله.

قلتله: - بقولك إيه .. أنا قابلت بنت قالتلي كذا كذا واتجرحت قوى من
كلامها .. وأنا قررت اتحجب.

بصراحة أنا مش عارفة أنا قلتله كده ليه .. أنا مقررتش اتحجب ولا حاجة ..
غالباً كنت بطفشه .. بس الحطة عشان مش مدروسة مجبتش نتيجة لأنه ماطفش
ولا حاجة بس ابن اللذينا اداني كورس مكثف - نظري وعملي مقترن بشهادة
الشهود يفيد بأن الحجاب حاجة وحشة وملهاش علاقة بالدين.

وأنا طبعاً ولا دخلت كلمة من كلامه وكلام أمه وخالته وبنات خالته دماغى
بشلن .. وأيامها تعني غصروف القفا من كتر ايماءات "حاضر" بدماغى.

الحقيقة إني كنت بميل مع الوقت للحجاب بعد حجاب ماما و كمان حجاب
هبة صاحبتني وزميلتي من أيام الحضانة ولحد الجامعة .. بس مكنتش حاسة إنه
ينطبق عليا .. أو مكنتش حاسة إني أقدر أعمله .. بس كنت بفكر فيه كمعني مجرد
وكان كفكرة عاجبني .. إلا إن هناء أسدلت الستار مُعلنة إنتهاء فترة إعجابي
بالحجاب ..

الملافظ سعد يا هناء!!

عريس في سبيل الله

الناس إلهي بتعمل كل حاجة عشان ربنا وفي سبيل الله دول بيهروني .. تخيل حد عايش وهو حاسس كل لحظة إن أي حاجة بيعملها لازم تكون لله .. قوة تحكم ماهرة .. كونترول محصلش .. فائدة جبارة للأمة .. يعني الكلمة لله والتصرف لله واللقمة في سبيل الله والمعاملة يتقوا فيها الله ..

الناس دول كلامهم جميل قوي .. مش بيكشروا .. ولا يقولوا كلام جاح .. بيسهلوها .. بيخلوا الدين لذيد وروش وقريب ومعقول ..

بيخلوا الواحد يكاد يشوف الجنة بعينه من كتر الوصف فيها والإسهاب في الحديث عن رحمة ربنا وغفرانه وحبه لنا .. مبتكلموش في ترهيب .. في منتهي الكرم .. والمعاملة الحلوة.

عرفت إزاي؟؟

ما هو أنا بعد ما خلّصت جامعة واتخلصت من التدبيسة .. دَوَرْت على شغل ومن غير مساعدة بابا .. مِنِّي لنفسي كده .. قدمت على شغل وأنا فاكرة الحياة سهلة ولطيفة بس طبعاً اترزع الباب في وشي رزعة معلمة لحد دلوقتي!

قعدت في البيت مُعززة مُكرمة بمارس هوايات متعددة منها: الأكل، السهر طول الليل قدام التليفزيون والنوم نهاراً، تأليف أغاني وتلحينها وغناءها على سبيل الهواية طبعاً، إعداد أُرشيف مُذهل للأفلام الأجنبية، القراءة وخاصة سلسلة ما وراء الطبيعة (لأ .. ما ليش في روايات عبير) وبعض الكتب الأجنبية من باب الإحراج من أهلي إلهي علموني في مدارس لغات.

إلى أن رجع أحد الأقارب الألافرنكا من الخارج وقرر المسيو يزورنا بعد ما
سمع إني مريضة .. بصراحة بقى كان مرض وهمي أشعته في العيلة لغرض خبيث
مش حاقوله .. *ضحكات شريرة*

ودخل المسيو وقد عمل نيو لوك إفتكرته - لأني ساذجة باين - إنه لوك
الفنانين الفرنسيين البوهيمين .. كان لابس فرنسي بس مربى دقته .. والغريب إنه
كان مبتسم ومُشرق ومُتحدث لبق ومربرب على غير عادته .. حيث كان دائماً
وأبداً مسهم ومبوز ومسَلَوَع وفي حاجة ماسة لشوالين نشا منقوعين في برميلين
سمن بلدي لزوم المجاعة إللي كان دائماً فيها.

أتاري أحياناً بقى عايش في سبيل الله .. وأتارى الدقن دى علامة سُنّة .. وأتاريه
عينه مني عشان أنا محصلتش طبعاً .. وأتاريني أنا بنهر بالمثنين ..

والصراحة بقى إنه حبيبى في السُنّة والدين والجنة .. وسمعت منه كَأنى بسمع
لأول مرة .. وكَأنى حعيش نعيم دنيا وآخره .. فضل فترة طويلة يزورنا كل يوم
وكل حديثنا كان عن كل ما هو جميل في الدين والجنة .. كان بيقول حواديت
جميلة بتوصل معاني هي أصلاً في الدين بس طريقة سردها لذيدة وبسيطة ..
حواديت كده زى بتاعة ألف ليلة وليلة .. وكان بيقول أحاديث نبوية رقيقة قوى
.. أو يحكيلنا عن صَحَابِي دمه خفيف .. أيوة .. يحكيلنا .. أنا وماما ..

من كتر فرحتي بالدين إللي بسمع عنه ما كنتش مركزة قوى في قصة الجواز ..
ولما كنت بركّز كنت بفكر في إنه لو حصل حيبقى مصدر وجود الدين الجميل
إللي سمعت عنه ده في حياتى .. بس كان فيه حاجة تانية رعباني .. الست والدته
.. أخطر من إعصار كاترينا وأغرب من مثلث برمودا وغامضة غموض سر

التحيط عند الفراعنة وأي نعم .. عندها لعنة هي كمان .. والمسيو تقريباً مش
باين من تحت عباءة والدته ..

وقبل ما أوافق .. حصل انقلاب في حياتي ..

صحيت على صوت ماما وإيديها إللي بتهزني وبتهز السرير معايا .. كانت
بتصحيني عشان تقوللي إن ابن خالتي إياها جه عشان ياخذ حاجة كده كنت
واعداه بيها ..

صحيت .. دخلت الحمام .. وقبل ما أطلع لقيت ايشارب من بتوع ماما
متعلق ورا الباب .. لبسته وطلعت سلمت علي ابن خالتي واديتله الحاجات ..

ماما قالتلي : اتحجبتى؟

ابتسمت وقتلتها : آه !

بابا شافني قاللي : ايه إللي انتِ عامله في نفسك ده؟

قتله وأنا بمحاول اغلوش : شكلي ظريف صح؟

قالى : انتِ لسه صغيرة قوي .. ده عشان العريس؟

قتله: لأ .. أنا مش حقدّر أتجوزه ..

قالى: عموماً انتِ حرة

أيامها كنت في نظر الناس كلها صغيرة قوي .. خلي بالكو .. أيامها مكنش
فيه عمرو خالد لسه .. أظن قصدى مفهوم ..

التاج والإبتسامة

وأيام ما اتحجبت ماكنش فيه محلات بتبيع لبس محجبات صغيرين .. كان فيه أصلاً كام محل قليلين جداً لبيع ملابس محجبات في سن أمي وأكبر ..

ولأن عندي ذمة طول عمري وموت في المبالغة والقرارات السريعة وبحب أصعبها على نفسي، مرضيتش ألبس جيز وقميص طويل وإشارب وتتقضى... بل لبست لبس أمي فترة وبعدين حسيت إن العباية ارحم من تايورات الكبار فلبست عباية ..

إحساسى كان غريب أول مرة أنزل من البيت مُحجبة .. مبتسمة .. سعيدة .. فخورة .. ووالله بمجد كائن لابسة تاج على راسي .. وده تعبير سمعت ناس كثير بتوصفه .. شىء غريب صح؟ إن ناس كثير تحس إن فيه تاج على راسها ..

والأغرب إن كل قرابى تقريباً بعدوا عني .. مبقيتش أتعزم في أعياد ميلاد .. ولا خروجات ولا مصايف .. ولا بقى حد يزورنا .. وتعليقات عجيبة تفيد ان الـ لايف ستايل بتاعنا مختلف عنهم.

والأغرب وأغرب إن كل الناس الغريبة عني قربتلى وحتنى أكثر وأكثر .. ومتهياىلى إن الإنطباع بتاع "دى خواجايا مطرقة" اتنسى وبقي فيه احترام وتقدير في معاملة الناس ليا.

أي نعم مكنتش معجبة بمرات البواب وهي بتناديني : يا حاجة .. بس برضه .. كويس ..

حاجات كثير جوايا إتبَدِلت .. بقيت أسمع الشيخ الشعراوي لما يبجي في التلفزيون يوم الجمعة .. زمان كنت أشوفه بس أقوم مغيرة المخطه .. سبحانه الله .. بقيت متواضعة .. مش عارفة إيه العلاقة بس بقيت ألطف مع الناس حتى إللي مبيهمش ..

مبقيتش أتريق على حد بينطق إنجليزي غلط .. آه .. طباعي كانت بايخة قوي وقت المراهقة .. مكنتش طايقة حد .. إنما بعد الحجاب، عشت دور الأم تيريزا فترة لا بأس بها .. وكنت مبسولة .. وإبتديت أنام بالليل .. وأصحي بالنهار .. زى الناس العادية ..

إبتديت أقرأ القرآن بتفسيره وأسباب نزول الآيات .. وبقيت أقرأ أحاديث الرسول الخاصة بكل العبادات والمعاملات والعادات .. وانبهرت بالتفسيرات العلمية للحاجات إللي في السُنّة ..

مبقيتش أخرج من البيت كثير بس كنت سعيدة ..

تجاهلت تماماً نظرات بابا إللي مستغرباني ..

تجاهلت تماماً رمى الكلام والتريقة من أصحابي وقرايبي ..

كنت مركزة قوي في النفع إللي ورا الحجاب .. كنت مركزة في السعادة إللي حساها .. في الصلاة إللي فجأة بقت سهلة عليا ..

كان نفسي الناس تقبلني زي زمان .. بس ده محصلش وقتها ..

مُحَبَّةٌ فِي لَاسِ فِيجَاسِ

شُغل بابا كان فيه سفر كثير .. أول ذكريات طفولتي كانت في لندن .. أعتقد أهلي عاشوا هناك سنتين .. إللي فاكراه من لندن حاجتين .. ولد كنت بلعب معاه في الهايد بارك (جُنيينة) والتليفزيون الصغير إللي كان في شقتنا .. كان عندي وقتها ثلاث أربع سنين ووالله فاكراه الحاجات دي .. أنا ذاكرتي البعيدة قوية وذاكرتي القريبة ضايعة .. وعشان كده أنا متأكدة ان القصة المُغرِضة إللي ماما بتحكيها عني دائماً كل ما بتفَرِّج حد على ألبوم الصور بتاعي وأنا صغيرة وبلعب في البارك مش حقيقية .. أنا ما بوستش الولد إللي كنت بلعب معاه .. محصلش محصلش محصلش!!!

أما آخر سفريّة مع بابا كانت لأمریکا .. بعد حجاي .. أنا كنت حاسة إنه متردد ياخذني معاه .. وأخيراً أخذني .. وإحنا في الطائرة فضفضلي عن أفكاره بالنسبة للموضوع ده.

- أولاً أنا راجل فنان وبالتالي معظم أصحابي فنانين ومش عايز يحسوا إنك ضدهم أو واخده موقف عدائي منهم.

- إيه ده .. بس أنا مش ضد حد يا بابا .. إذا كنت إنت بابا فنان وبجبك وبحترم شغلك بل ده أنا ورثاه كمان.

- أنا فاهم يا روح بابا بس إللي حيشوف بنت صغيرة لابسة ايشارب أد
ملاية السرير وعباية سودا حيفكر أوتوماتيكلى إنها ضده ورافضاه .. ما هو
مظهرنا بيقول ستايتمنت عننا ..

- صحيح مظهرنا ستايتمنت بس لما حيتعاملوا معايا حيلاقونى ظريفة زى
مانا .. أنا مختلفتش ..

- يا حبيبتي إحنا أصحابنا إللي حنزل عندهم كريستيانز .. يحسوا بإيه هما
وفيه خيمة آدمية متحركة جوا بيتهم؟

- عادي .. ما هي طنط لوسى كريستيان وأقربلى من أي حد ومع ذلك
فاهمة ومستوعبة إن حجابي قرار شخصي ملوش أي علاقة بيها .. وعارفة كويس
قوي إني بموت فيها وبجترمها وهي كمان بتحبنى .. مفيش حاجة بيننا اختلفت

- ده يمكن عشان هي ست عندها مُخ يوزن بلد ومُتفتحة وكمان عايشة في
مصر بقاها سنين، إنما دول خواجات .. بس انا كمان قلقان عليكى من حاجة تانية
.. مش عايزك تبقى ديس - اورينتيد .. كده مش حتبسطي من الرحلة ..

- إطلاقاً .. آى ويل هاف فن ماي واي .. بس!

أيوأ .. احنا كُنّا بنرطن إنجليزي مع بعض كثير .. والحالة دى كانت بتزيد أول
ما نساfer .. حاجة لا شعورية بإننا حنبتي رحلة حنبقى فيها مش احنا شوية ..
الغرب وعمايله .. والشخصية المصرية وعمايلها!!

وصلنا عند أصحابنا في لوس انجليس .. كان فيه شبه تفتحة على وش ميشيل،
أما مراته فكانت أذكى .. مظهرش عليها أي انفعال لما شافتنى .. طبعاً العيشة ٢٤

ساعة بالحجاب جوة البيت وبراہ شيء صعب جداً .. وطبعاً بعض الناس في الشارع أو اثناء رحلات الشوبنج كانوا ييصولی كآنی بنت خالة E.T بس الحقيقة إن معظم الناس ولا مركزين مع أي حد ولا فارق معاهم مين لابس إيه.

وفي يوم ميشيل كان مرتب لبابا رحلة إلى لاس فيجاس..منها فسحة ومنها إن بابا يقابل واحد صاحبه مُهم .. أخذنا العربية وإتجهنا ..

بالرغم من إني طبعاً كنت عارفة يعني إيه لاس فيجاس.. عارفة إنها مدينة القمار في امريكا إلا إني برضه مكتتش فاهمة قوي .. حيث إن الموضوع كلام أفلام وأكد فيه مبالغة .. أكيد مدينة يعني بشر وناس عايشة وحاجات تانية موجودة غير القمار .. أصل القمار موجود في كل فنادق العالم حتى في مصر .. ومع ذلك في حياة سوية في المدينة..فاكيد السينما بتبالغ.

وصلنا لاس فيجاس والدنيا بتلّيل .. دخلنا فندق اسمه قصر القيصر .. وأكلنا في المطعم .. ودى كانت من اللحظات المؤلمة بالنسبة لي .. أصلي كنت مركزة في قصة الأكل بره مصر .. يعني نوو لحوم عشان الدبح الشرعي ونوو أي شيء يُشْتبه إن فيه دهون خنزير .. وعشان كده كنت مقضياها سمك .. وأنا نصي اسكندراي وأموت في السمك .. أعزه جداً .. بس مش كده .. مش كل يوم .. مش كل وجبة لمدة ثلاث أسابيع .. ولما أحب أغير آكل تونة .. اسمحولى أعيط شوية وأرجع أكمل..

خلاص .. أنا كويسة .. معلش .. الذكريات الأليمة وخصوصاً المتعلقة بشيء عزيز على قلبي ..

حطينا شُطننا في الأَوْض .. ونزلنا .. ميشيل دخل الكازينو.. إللي بعكس مصر مفتوح لكل الناس .. مش فارق بقى لابس شورت أو لابس بدلة أو حتى لابس

غطا عربية .. أي حد يدخل .. دخل يلعب زى ما الأطفال بتلعب في الملاهي ..
كأن ده مش قمار .. كأنه بلاي ستيشن أو دور طاولة على القهوة ..

بابا قابل واحد صاحبه قعد يرغى معاه .. ميشيل ومراته ضحك ولعب وهلس
وحب ..

أصوات ماكينات اللعب بترن! بترن! أصوات ضحك وكلام .. طبعاً ٩٩%
من الناس ماسكة كاس منقوع براطيش أو إزازه بيرة .. وطبعاً الستات كلها تقريباً
نص عريانة وتقريباً قاعدين على حجر أو رقبة الرجالة إللي هناك، والرك على
الشطارة وطول السيقان .. كل ده شايفاه وأنا جنب بابا إللي عمال لوك لوك لوك
مع صاحبه قريب من الباب بتاع الكازينو.. شوية شوية حسيت إني بتخنى ..
استأذنته أطلع بره عند النافورة العملاقة إللي شفاها وإحنا داخلين .. نافورة
بترقص على المزيكا .. نافورة فيها كل الألوان .. الخنقة زادت حتى وأنا بره
بترج على النافورة .. لقيت بنش رخام قعدت عليه .. وراحت الخنقة مع أول
دمعة نزلت من عينيا ..

وكانت أول مرة أكلمه فيها .. قتلته:

ليه .. ليه سايب كل الكبائر ده تحصل .. ليه سايب مدينة كاملة قايمة على
المعاصي .. الخمرة والدعارة والقمار .. ليه .. إيه كم الشياطين إللي هنا ده؟
كنت محتوقة من كم الحرام إللي مُحيط بيا .. ومحدث يقوللى إسلام وتشدد ..
الدعارة في كل بلد في العالم ضد القانون .. والقمار في كل بلد في العالم ضد
القانون .. لو اتعملوا بدون تصريح .. يعني هما أصلاً غلط .. غلط الدولة بتسمح
بيه فقط لو تحت مظلتها وحيعود عليها بالمصلحة ..

طيب أقول إيه .. ده اسمه إيه .. ممكن حضرتك تلاقي الاسم وتقولاه بالنيابة
عني عشان الرقابة؟ طيب في دين في العالم بيعيهم؟؟ أmaal الناس بتعمله ويتشوفه
وبتسمح بيه ليه؟ وإللي يقول كلمة حرام يبقى جاهل ورجعي ومتخلف ومتشدد
وعايز الولعة..

المشكلة في الكلمة إذا .. طيب نسميه مُضِر .. القمار يضرب بحبيب سعادتك يا
غبي، ولو كسبت حتى وده نادر .. فهو يضرب بحبيب واحد غيرك غبي برضه!
قيس على كده الحمرة والدعارة بقى .. مُضرين .. بلاش كلمة حرام إللي
عاملة ارتكاريا للعالم ..

اليوم ده كان من أقسى الأيام عليا لأني حسيت بوحدة مرعبة .. تخيل لما تحس
انك نوع لوحذك محدش حاسس زيك وسط مدينة كاملة ..
الوحدة وسط الزحمة .. أكثر نوع ألم ممكن يحسه شخص..
وقررت إني ما احسش كده تاني أبداً.

لا يأكل الذئب من الشاه
إلا القاصية

رن التليفون .. رديت لقيت صوت أنثوى ظريف جداً وباين عليه إنه شيك
وابن ناس ..

- ازيك .. عاملة ايه؟

- الحمد لله

- انا اخدت رقمك امبارح بس .. وسورى فور ذا شورت نوتيس بس
إحنا عاملين قاعدة صغيرة كده بكرة ويا ريت تيجي عشان نتعرف .

- مرسى جداً ع الإنفيتيشن دى .. طيب إمتى؟

- بعد صلاة الظهر

- طيب .. إن شاء الله أعرف آجى

- يا ريت والله .. اوصفلك البيت ..

ورحت تاني يوم .. وتعرفت على مجموعة من أجمل البنى آدمين إللي عرفتهم في
حياتي .. ستات كلهم طبعاً .. متدينات

طبعاً .. شيك جداً وولاد ناس جداً ومستوى هاى وما شاء الله عليهم ..

اكلنا وشربنا وهزرننا ودردشنا وبعدين اتكلمت السيدة اللطيفة صاحبة العزومة
.. قالت :

بسم الله والحمد لله والصلاة والسلام على رسول الله .. انا مبسوطه قوي ان احنا التجمعنا النهارده .. الواحد الحقيقة يبقى سعيد جداً ان ربنا حط في حياته ناس جميلة تساعده على الطاعة ويقوا بجد اهله وأكثر كمان .. كل واحد فينا ربنا مَن عليه بالالتزام واجه صعوبات او رفض من اقرب الناس اليه .. ولأن الالتزام صعب في وسط انحلال كبير ييغزو مجتمعنا وفكر غربي مسيطر علينا فاحنا لازم ناخذ بنصيحة النبي عليه الصلاة والسلام لما قال : "عليكم بالجماعة، فان الذنب لا يأكل من الشاه الا القاصية" او كما قال صلى الله عليه وسلم .. يعني ما فيش ديب ييهجم على قطع .. لكن لو شاه سابت القطيع وشردت لازم حينقض عليها ويفتك بيها. انا عارفة ان كلمة جماعة تخض خصوصاً كل المسلسلات دلوقتي عاملة سُمعة وحشة قوي للكلمة .. بس الحقيقة المقصود منها المجموعة .. ان محدش يبقى لوحده .. جروب يعني .. واحنا محتاجين

الساٲورت ده من بعض .. عشان كده لازم نقرب من بعض ونبقى لبعض مجتمع صغير متكاتف قادر يعيش ويواجه المجتمع الكبير المتناقض.

انا سمعت الكلام ده وقلبي ارتجف .. أيوة .. هو ده .. هو ده إللي انا محتاجاه..إيه الجمال ده .. إيه الرُقَى ده .. ايه الناس دى .. ملايكة .. معقول .. معقول ستات يجتمعوا في قاعدة ميقاش فيها ولا نغمة ولا قباحة ولا اى حاجة وحشة .. كلها كلام جميل وطيب وكرم واخلاق حلوة .. بقى فيه محبة كده لله في لله؟؟

حسيت إني مندجّة ومش غريبة .. حسيت ان حجابى حلو وسبب إني اعرف ناس جميلة .. طبعاً محدش في القاعدة ده كان لابس حجاب .. ستات بقى وقاعدين مع بعض في بيت .. بس باين من اللبس، وكم الاشارات إللي متطبق بعناية على

احد التراييزت الجانية كان خير دليل على ان التزامهم مكنش جوهر بس .. بل مظهر كمان.

كنت مُبهره .. وانبهرت أكثر لما عرفت انهم برضه عايشين في سبيل الله .. يعني نفس الفكرة إللي عجبني في الأول .. حسيت إني سعيدة قوي .. بل سعيدة جداً .. ودمعت .. وحسوا بيا ففرشوني وهزروا وحكىتلهم انا مين وازاى .. وهما كمان حكولى .. كل واحدة لها قصة مختلفة عني بس متشابهة في انا مكناش مرتاحين وحياتنا مفهاس ربنا قوي .. انا عن نفسي مكنتش مرتاحة لسبب مكنتش فهماه .. خوف .. شك .. مش عارفة بس مكنتش مرتاحة وبالرغم من ان عندي كل حاجة تخلىنى سعيدة مكنتش ابدأ مستمتعة بالسعادة ده .. انا عارفة ان السعادة او الايمان مش شرطه الحجاب ومش علامته الحجاب .. ياما في ناس سعيدة وراضية ومحترمة وجميلة من جوا وهما مش محجبين .. سواء مسلمين او غير مسلمين .. بس ده كانت تجربتي وده كنت انا .. يمكن علامة التغير الداخلى إللي بتظهر للناس هي مظهرنا .. زى كده ما الحزين يميل للهدوم الغامقة والمَرِح بيضرب اصفر كتاكيتي والرومانسيات الحالمات تلاقى كل حنة فيهم بمى .. يعني مثلاً عمرك شفت ماسكرا بمى؟ .. والناس البروفشينال الجامدين تلاقى حياقم بقى لوها رصاصى او كحلى على احسن تقدير .. كمان علامة القرب الداخلى من الدين والرغبة في الالتزام بتعاليمه بحثاً عن التقرب أكثر بالافعال بيظهر في علامات .. اللبس يطول وأماكن الفُسح بتبعد كل البعد عن الديسكوهات وما شاهها وترتيب الوقت بيبقى حسب مواعيد الصلاة والمفردات تتغير من اوكى وشوور لـ إن شاء الله وياذن الله .. وانا متهيألى ان الناس نوعين .. نوع مش مقتنع أصلاً وده حُر تماماً في اختياره .. ونوع تايي مقتنع وغرقان في خوف .. خوف من انه يسبب إللي يعرفه ويقرب من حته مش مجربها .. خوف انه يغير حياته .. وده يا إما

يفضل طول عمره نفسه بس خايف يا اما بينط مرة واحدة في بحر ميعرفهوش ..
طيب نتيجة القفزة الجريئة ده مضمونة؟؟؟ يعني بالضرورة لما حبعد عن شلة الأنس
ومش حاخذ درينك على حمام السباحة واغطى جسمى حابقى سعيدة وناجحة
ومرتاحة؟؟

الحقيقة النتيجة مضمونة .. بس معرفتنا بيها احياناً بتيجي على طول وبتتوقف
في حاجات حلوة تثبتنا فلتنزم ونصدق .. وأحياناً بتأخر .. وساعتها إللي إمانه
قوى بيخليه يصمد أدام الإغراءات او المشاكل لحد ما دنيته تتعدل .. وفيه إللي
بيزهق والدنيا بتسود في وشه وبيلاقى ميت واحد يقنعه ان قراره كان خطأ ..

اكتشفت ان معظم الناس خوفها واحد وصراعها واحد واخطاؤها واحدة ..
كله عايز يبقى عايش سعيد أياً كانت الوسيلة .. ومعظمنا خايف من ربنا لتكون
المقاييس ده آخرتها جُهنم .. وكُلنا بنصارع نفسنا الأمانة وشيطاناً وشيطان الناس
.. وكُلنا بنقع في نفس الخطأ .. خطأ الظن باننا مطبوظين لحد ما بنفوق على
كارثة..

ومن بعد الكارثة بنتعلم حاجة .. وبعدين حاجة وبعدين حاجة .. بإختصار
كده، مبنجيش بالدوق!

عين واحدة

.

مش طلّعوا صاحباتي معظمهم مُنقبات .. مش اكتشفت ان النقاب أعلى
مظاهر الزُهد من ناحية المظهر .. مش عرفت ان كل ما الراجل تدين بيرفض ان
حد يشوف مراته غيره .. أو يتعامل مع مراته الا للضرورة.

ممکن حد يفتكر إن دى مش عيشة وإن الحياة كده خنيقة او إنها مستحيلة
حيث إن الست بالطريقة دى لا حتشتري حاجة من بيع راجل ولا حتروح
لدكتور راجل .. طبعاً في الحالة دى فكرة صداقة الرجل بالمرأة أو زمالتهم في
العمل فكرة محذوفة وغير واردة أصلاً ..

وبالرغم من ان فيه منقبات كتير بيشتغلوا او عاملين مشاريع خاصة الا ان
مفیش واحدة من صحباتى كانت بتشتغل .. كلهم هاى كلاس واجوازهم اغنياء
.. بمعنى أصح أمهات

فاضلات وستات بيوت .. طبعاً هما متعلمات وأغلبهم يتقن لغات عدة ..

ياختصار .. الظاهر عليهم إنهم مقفلين وأشباح النينجا ترتيلز .. إنما الحقيقة
إنهم بيخرجوا وبيتفسحوا ويسافروا ويركبوا احسن عربيات وعایشين حياة فيها
من الدفء والأمان ما يكفلهم قدر هایل - متفاوت طبعاً - من السعادة.

أيوا .. سعادة!

الكائن ده الى إحنا ابتدينا نفقد تعريفه الدقيق .. ده أنا حتى سمعت إنهم شالوا
التعبير ده من معاجم اللغة والقواميس حرصاً على المصداقية .. محدش بقى عارف

إيه هي السعادة لأن محدش عنده أمانة أو تجربة شخصية يقدر يحدد بيها المعنى الكامل للسعادة أو يدلنا على طريقة الوصول إليها.

أنا بقى في ظل الاندماج الرهيب إللى حصل في دماغى بين فكرة "أنا ألتزم إذا أنا سعيدة" وبين جذورى الفنية التى تميل الى الغرب .. عملت مُنتج جديد .. كائن جديد .. شىء كده نتج عن تزاوج الجيتر المقطع مع حمار إسود غطيس ..

وأخذت قرارات سريعة :

رقم واحد : بما إن الحسنات بتذهب السيئات .. حغطى جسمى كله زى ما عريته كله على البحر لسنين طويلة .. وبكده .. تذهب ذنوب المايوة وتيجى حسنات النقاب وتبقى قُلة .. بس ده كان هدف مؤجل .. مرحلة متقدمة يعنى .. خطة طويلة المدى غير محددة الأجل .. إيه؟؟ محدش يتريق .. عالأقل أنا خططى لفترة زمنية مفتوحة مش بقول خطة خمسية او عشرية وبعدين تكتشفوا الخطة إتخطت في المتحف عشان متبوظش من الركنة وعوامل التعرية ..

رقم اتنين : اتجوز واحد ملتزم .. يعنى إيه ملتزم؟؟ طبعاً مقصدهش انه بيمشى ع الرصيف ويوقف لما الإشارة تبقى حمرا .. قصدى متدين .. فاهم يعنى إيه واحدة أمورة مش عايزة حد في الدنيا يقولها إنها مُرة إلا جوزها .. وده بقى عايز بحث وتفحص وتمحيص ..

أظن مية مية .. عذاني العيب وقرح ..

ومرت سنين .. وعدت سنين .. ونفذت المخطط المشار إليه بعاليه وأنا مبسولة بالدين .. سعيدة بالأمان .. بنام مثل أي درفيل يحترم ذات نفسه .. حاسة بتناغم تام بين نفسي وأنا .. وعارفة أتفاهم مع عفاريتى بتوع زمان ..

بس في يوم الباشا أبو العيال قرر إنه يقوم برحلة سفارى .. أنا كنت متعودة على كده .. كل شهر تقريباً في رحلة للشلة .. سفارى أو مطروح أو وادى الريان أو أليكس ولو مش فاضى يطلع العين السخنة صدّ ردّ لزوم تغيير الجو .. الباشا - على حظى الفقر - كان غير كل بقية أزواج صاحباتى .. كان بيتفسح ويخرج ويسافر بس لوحدة مش مع القاموليا .. وعشان كيرياىى مكنتش بعمل زى الستات بتوع المسلسلات العربى إللى بتتخانق على فستان أو خروجه .. وأقنعت نفسي إنه إتس أو كاي .. ما أنا ياما شبت سفر وخروج في أحسن تحت في العالم مش بس مصر .. معلش .. المهم الستر .. الهدوء .. الأمان ..

في اليوم ده وأثناء تحضيرى لحوالى مية وسبعين ساندوتش فراخ بانيه لزوم الرحلة .. طلعت في دماغه فجأة يقوللى الآتى:

- إنتى حتخرجى في حطة وأنا مسافر؟
- أيوة .. حذور خالتى (مش اياها .. خالتى الثانية الصغيرة أم دم خفيف) وينتها وإحتمال أشوف الجماعة بُكرة إن شاء الله.
- طيب .. مفيش أي حطة تانية رايحاه؟
- وأنا بروح حطة تانية غير زيارة خالتى كُل شهر مرة وزيارة الجماعة يوم في الأسبوع؟
- انا بس بطمنن ..
- بس؟! (على ماما يا بابا... شكله كان عايز يقول حاجة)
- انا ليا عندك طلب يا قمر إنتِ ..
- إطلب ..

- تحطى حاجة على عينيكى وإنتِ نازلة ..
- إزاي يعني؟؟ هاهاها
- إيه إلهي بيضحك؟
- أنا من النوع ده .. لما أبقي مش فاهمة أو مش عاجبنى حاجة بضحك الأول وبعدين أتفاعل ..
- مش عاجبك إزاي يعني؟؟ مش عاجبك ان جوزك بيغير عليكى ومش عاجز حد يشوف العينين الزرقا المشعة دى من النقاب .. دى ملفتة كده أكثر من لو كنتى شايلة النقاب خالص ..
- مش حناقش قصة الغيرة دلوقتى خالص حفاظاً على دمي من الحرق .. خصوصاً انك مقضيتها فُسح لوحدك على طول وكل الناس شايفاك كُلك على بعضك .. وكمان مش حتناقش لأنى واثقة فيك .. أنا بس حاسألك سؤال .. أشوف إزاي الطريق؟؟ أنا أصلاً نظرى ضعيف والعدسات بتتعبنى في السواعة ..
- طب أقولك .. عارفة أصلاً الشيخ فلان الفلاني بتاع السعودية قال إيه؟
- إيه يا ترى .. الحقيقة آى كانت وييت تو هير
- قلبتى انجليش يعني متعصبة ..
- لأ .. قول .. قال إيه شيخ السعودية؟
- قال الست ميبانش منها غير عين واحدة بس ..

- ووقعت في الأرض من الضحك .. مجد .. بقيت أعيط من الضحك
والغيظ في نفس الوقت.

- أقولك انا حاعمل ايه يا حبيبى عشان برضه ميهونش عليا غيرتك .. انا
حأفقع العين الثانية بما إن ملهاش لازمة .. يا عم وحدّ الله وإتكل على الله
عشان متأخرش على أصحابك ولما ترجع نبقي نتكلم.

ولحد هنا والدنيا كانت ماشية بالعقول .. لا إيزى أوى ولا فيها مشاكل
عريضة .. فيها اللطيف وفيها الخنيق .. وانا أصلاً من النوع الصبور .. بس كنت
دائماً حاسة إن في حاجة مش مذبوطة... وإحساسى كان مالبنى.. وانا بصدق
إحساسى.. بس حرصى على تقوى الله كان دائماً بيفكرنى يان بعض الظن إثم بقى
وكل الآيات والأحاديث المشاهدة.. كنت بأحاول أتجاهل إحساسى وأحمد الله على
نعمة... وخصوصاً إن عينيا الإثنين لسه في مكانهم!

مِنْكَ اللَّهُ يَا دَكْتُورَة !!

التليفزيون .. ذلك اللعين إلهي ينقل كل قىء البشرية لبيتنا الصغير ..

التليفزيون .. ذلك الجهاز العبقري إلهي يحط العالم بين يديا ..

آخر قنوات الإتصال بينى وبين حياتى السابقة ..

وبسببه محصلتش فجوة زمنية بين ما قبل الحجاب وما بعد النقاب .. يعني
فضلت باعرف أحدث الأفلام ومين من النجوم مِثل إيه ومين أخذ الأوسكار كل
سنة وأحدث الأغاني وأحدث الأخبار ..

بسببه إنهرت بناس تانية غير إلهي حواليا .. بهرنى شاب صغير عاش طول
عمره في امريكا والتزم دينياً وكلامه كان جميل جداً وبالانجليزى وإتميت ساعتها
إن إبني لما يكبر يبقى زيه .. شيك ومنهجه متوسط وفاهم ومثقف ولّين ومنطقى ..

بسببه عرفت شيخ معنى غاية في الرقة والرُقَى .. كنت بانتظر حلقاته عشان
أبكي وأحس إني هديت من جوه ..

وبسببه استمتعت ببرامج ست لبنانية عجوزة عندها أسرار الصحة البدنية
والنفسية .. وبسببها البيت كله قلب نباتى وماكروبايوتك ..

وبسببه قضيت وقت كتير متسلية وأنا قاعدة في البيت ..

وبسببه عرفت لأول مرة إني عندي حاجة عايزة أقولها ..

كنت بتفرج على برنامج ديني على إحدى الفضائيات بعد صلاة الجمعة ..
كنت مَحْضُوضَة من أسئلة المشاهدين المنحصرة في مواضيع الحواجب ووصل الشعر
والصلاة في غير موعدها .. لحد ما واحدة اتصلت وسألت عالمة مصرية كبيرة
وشها غير مُريح إطلاقاً .. سألتها عن النقاب .. العالمة الدكتوراة ذات الرداء
الكُحلي والحواجب الرفيعة بصت للكاميرا كأنها بصالى .. وشَتَمَت فيا شتيمة!
واتريقت عليا تريقة! وطعنتني في شرفي وأخلاقى! قالت عليا حرامية بستغل النقاب
عشان أسرق وقالت عليا زانية وبستغل النقاب عشان اقابل عشيقى في الخفا
وقالت عليا بغش في الإمتحانات مُستغلة النقاب ..

محسيتش بنفسى غير إني بقول حسبي الله ونعم الوكيل .. انا مش مسامحاكى يا
دكتوراة .. منك لله .. منك لله ..

أبوة أخذت كلامها انه موجه ليا شخصياً .. لأنها قالت كل.. ما قالتش بعض
.. وكأن محدش بيستتر ورا حاجة عشان يعمل حاجة غلط غير المُنقبة ..

بعدين .. هي متعرفيش ولا تعرف أصحابى .. لا تعرف علمى ولا اخلاقى ولا
تربيتى ولا طباعى ولا ثقافتى ولا أى حاجة عني .. إزاي تشتمنى كده .. إزاي
تجرحنى كده ..

وهى الشتيمة حتى لو موجهة لحاطىء مش حرام؟؟ ايه التناقض ده؟ ايه
الإزدواجية دى؟

وإتغطت .. هو أنا الست الموضوعية الوحيدة في الدنيا ولا إيه؟؟

مش هي بس إللي ظالماني .. المتحررين كمان ظالمنى ..

هي الناس إللي طالعة روحها مناداة بالحرية دى مش بتطبقها هي نفسها ليه؟

ليه كله مصدّر الأحكام المسبقة تجاهي؟ ليه كله متهمنى بالتخلف؟ ليه كله عايز
يحرمنى من حريقى الشخصية إني ألبس إللى يعجبنى وأعمل إللى يعجبنى ما دمت
مش بضر حد؟

إشمعنى أنا بحب كل حد كويس وطيب بصرف النظر دينه إيه ومختار أهى
حياة؟؟

إشمعنى أنا بحترم حرية الناس ومش بشتهمهم؟

إشمعنى؟

وإتقهرت .. وحسيت إنى لازم أتكلم عن إللى أنا مؤمنة بيه وعن معتقداتى ..
مش أتكلم فى حجاب ونقاب وصلاة .. لأ.. أتكلم عن الموضوعية والحرية
الحقيقية وإحترام البنّى آدمين وآدميتهم .. عن حلاوة الإيمان وعظمة العطاء ..

كنت عايزة أصرخ وأقول لحد إفتراضى : عاملنى كشخص مش كشماعة كل
إللى يهملك انا متعلق عليها ..

كان لازم أتكلم .. بس مكنتش عارفة أتكلم فىن .. ولا لين .. ولا إزاي ..
وفي مرة واحدة صاحبتى ذكرت قدامى إن فيه مدونات على النت .. ليها كل
الحرية ..

والحرية هي ما كنت محتاجة..

ولأنى مش هائلة فى العربى لأن تعليمى إنجليزى .. وبما إنى مش برفكت فى
الإنجليزى لأنى فى النهاية مش إنجليزية .. قررت أكتب على مدونتي باللغتين ..
أهى واحدة تسند الثانية.. وكتبت .. وإتسمعت .. وفرحت بالناس .. وعرفت ان
دى سكتى .. لما يبقى عندي حاجة أقولها .. لازم أقولها!

مفیش أفهم من كده

عمري ما كنت من الأشخاص المخطوطة بشكل خاص .. أقدر أقول عادية ..
ممكن أتفاجيء بحاجة ظريفة كل فترة كده .. إنما إللي حاططني أنا تحديدأ في دماغه
هو سوء الحظ غير المتصل ..

ما في مرة أمشى في طريق إلا وأقعد في نقرة .. ولا مرة تحصى حاجة بايخة في
يوم ويتكسف على دمه - اليوم- ويقول كفاية عليها كده، لأ .. لازم يكمل
سيمفونية المواقف البايخة لحد ما اليوم يقضى عليها خالص ..

حتى في عالم التدوين ،

يحصل ان ضغطي يعلى ودمى يتحرق وأعصابي تنهار .. بيحصل .. زى
يومها كده .. لما أصابني فقع متكرر للمرارة!

لسه يا دوبك بقول يا صباح التداوين وبكتب الباسورد .. نحت إعلان
تدوينة أخ أمريكاني بيدرس في جامعة ما بيشتكى يا عيني من منشور وزعه أحد
الدكاترة يدعو لمنع إنتشار الدين الاسلامى بحجة إن ده إنتشار هادم للثقافة
الامريكية .. وسمى الدكتور ده دعوته بأنها ثقافية وليست عنصرية .. طبعأ في يوم
واحد التدوينة دى كان عليها ١٥٠ تعليق .. ١٠٠ منهم يتفق مع المدون في إن
دى دعوة للكراهية تتنافي مع الدستور الأمريكى إللي بيكفل حرية الدين لكل
مواطن أمريكى .. و ٥٠ نازلين شتم في المدون وفي الإسلام .. (أظن واضح كده
ليه الفقع كان متكرر)

مش بس شتموا .. دول دعوا كل مسيحي مؤمن حقاً إنه يطرد أي مسلم من
شغله ولو قدر من بلده.. بما أن القتل مش وارد حفاظاً على سلامتهم الشخصية
.. وكانت حجتهن إن الاسلام يدعوا لقتل المسيحيين ..

وإعنيت ساعتها لو حكيتلهم عن طنط سالى ..

طنط سالى جارتنا من سنين طويلة .. طنط سالى بتحبنى بجد وكأنا خالة من
خالاتى أو عمة من عماتى .. طنط سالى بتزين شارعنا كله بفوانيس عملاقة من
الإزاز الملون والنحاس وبتفرحنا كلنا برمضان .. طنط سالى شفتها بالصدفة وهي
بتزور ملاجىء أيتام تابعة لجمعيات شرعية إسلامية .. طنط سالى بتوصى أي حد
من معارفها مسافر عمرة أو حج يجيبلها سبعة وسجادة صلاة .. طنط سالى
بتسمى قبل ما تاكل وبتصوم معنا رمضان زى ما بتصوم صومها وتوزع شنط
رمضان على المحتاجين وعمرى ما شفتها خارجة من غير إيشارب على راسها ..
غير مرة كان عندها فرح

في المقابل ومش عشان لازم يبقى فيه مقابل إنما عشان ده من القلب بجد، كلنا
بنحبها قوي وبنعتبرها من عيلتنا .. كلنا بنثق فيها زى ما هي تثق فينا .. عيد الأم
عندي يعني هدية لأمي وهدية لخالتي وهدية لطنط سالى..ياما فيه مواقف بيننا من
أحسن ما يمكن .. ياما إحتاجنا لبعض وياما وقفنا جنب بعض ..

كثير طلوعوا عليها إشاعة إنما مسلمة في السر .. وعشان أنا بحبها وفي نفس
ذات الوقت عشان مفتاح بقى ضايع من زمان، سألتها في لحظة روقان:

- طنط .. ايه حكايتك بقى؟ (مع ابتسامة مُشجعة)

- حكاية إيه يا حبيبة طنط؟

- حكاية الإيثارب الشيك إللي إنتى لابساه وصوم رمضان وشريط دعاء
ختم القرآن من مكة إللي سمعت صوته طالع من عندك امبارح؟

- عادى .. زي زيك

- يا طنط .. بجد قوليلى .. حضرتك مسلمة؟

- بصى حبيتى .. كل واحد فينا تولد لقى أهله لهم دين .. وكلنا اتبعنا الدين
إللي عليه اهلينا .. بس الواحد لازم يفكر ويشغل مُخه .. ولما فكرنا أنا وبابا
الولاد - ما احنا متجوزين صغيرين قوي - لقينا ان مش معني اننا مسيحين يعني ما
نؤمنش بمحمد والإسلام .. وارتحنا لفكرة ان ربنا كلنا واحد وان الأنبيا من البشر
وكلهم مرسلين من الله وان كل الأديان حلوة الا اذا إحنا بوطنها في حياتنا
بغباوتنا .. أهم حاجة محدش يكره حد حتى لو مختلف عنه وأهم حاجة المعاملة
الكويسة والرحمة بين الناس .. أما القناعات بقى فكل واحد يختار إللي هو عاوزه
عشان دى حاجة بينه وبين ربه.

مقدرتش أقول حاجة (وده حدث جلل) وكل إللي قدرت عليه هو إني ابتسم
وانا فرحانة إن فيه في حياتي عقلية زى عقلية طنط سالى.

إرتحت ان زى ما احنا شايفين جمال اخلاقها وقربها منا هي كمان شايفة ده فينا
.. إرتحت ان تعليم امى ليا إني أحسن الظن بكل الناس واقيم البنى آدمين حسب
جودتهم واخلاقهم جه بفائدة .. والفائدة هي طنط سالى ووجودها القوى في
حياتى ..

لأن أحياناً تبقى منغمس في مبادئ وأفكار عالية وحقيقية وإنسانية بس تبتدى
ملاحك فيها تطمس من كتر ما إنت مش لاقى حد تستخدمها معاه او يقدرها..

وكتير سألت نفسي بعد الحوار ده... لو ما كانتش طنط سالى معترفة بسيدنا محمد (ص) كنت حبيتها أوى كده برضه... والإجابة كانت دائماً إن أخلاقها وطيبة قلبها يخلصون أما معتقدها الدينى ميخلصيش... لها دينها ولى ديني!

وعرفت إن الحل الوحيد للخروج من الحالة المؤسفة للعنصرية داخل مصر أو المهجوم الأعمى علينا من خارج مصر هو إن الواحد يركز في إنه يصلح نفسه وينصف مُخه من أي معتقدات مُضللة مزروعه فيه .. وإننا منبطلش توصيل لفكر الحرية الحقيقي واحترام الغير إللي بجد وتقدير الآخرين بذمة.

فهمت الحل بس مكنتش عارفة ازاي أطبقه في غيرى مش بس في نفسي ..

بحب الدقون...مبحش الدقون

ميشيل (بتاع امريكا) سأل أخويا يوم:

- إتغير شكلك اكثير (هو أصله لبناني)

- أيوه (مع ابتسامة لطيفة)

- شوف حبيبي .. إحنا عندنا هون اللوك لازم يبقى كلين .. بلا دقن .. وحتى

شو ما كان اللوك.. لما بترك بيبرد (لحية يعني) بتكون مهذبة ومرسومة رسم.

- آه .. فعلاً

- طيب إنت لَشو تاركها هيك؟ مو حلوة حبيبي ..

- ائم .. طيب خليني أشرح لحضرتك .. دلوقتي كل الشباب الصغير إللي

بيحبوا كورة القدم مطلعين موضه حلق الشعر زى رونالدو وكمات كلهم بيلبسوا

فانلة عليها رقمه .. صح؟

- إيه .. هيدا صحيح

- عشان بيعبوه قوي فيحبوا يشبهوله صح؟

- صح

- وانا بحب النى قوي وبحب اشبهله .. بس (ابتسامة أخرى لطيفة)

- فهمت (ابتسامة ألطف)

الحقيقة أخويا هو كمان تدين .. تقريباً في نفس الوقت بتاعى .. لا كنا بتكلم في الموضوع ولا إشتراكنا فيه بس حصل .. هو وأصحابه في سنة من السنين بدل ما يسافروا اوروبا في اجازة الصيف راحوا عملوا عُمره ..

مكنتش دقنه ستة متر وكل شعراية مخاصمة أختها زى ما بنشوف كتير ناس في الشارع .. لأ .. هو كان شاب لسه في الجامعة ودقنه قصيرة بس واضح على شكلها إن المقصود منها مش عمل ستايل جديد ونيو لوك .. كان واضح انه سَتَى. وعموماً بصرف النظر عن النية من وراها، أنا بحب شكل الدقن القصيرة المهدبة ..

ولما بقت مقترنة بالمتدينين حبيبتها أكثر .. لأنى فهمت إنها علامة حُبهم للنبي إلهي انا أصلاً بحبه .. وأكيد كنت قريبة نفسياً من إلهي شيهي وشبه إلهي بحبه ..

كنت بسمع كتير من قرايى على قد إيه الناس إلهي بدقون دول يقلقوا وإن فيه منهم ولاد لذينا نصابين وفيه منهم بلطجية وانهم بيقولوا قال الله وقال الرسول وعند الجّد ولا بيتقوا ربنا ولا حاجة ..

لما كنت بسمع كده كنت ببقى عارفة إن عندهم حق وإن أكيد في ناس وحشة في كل حتة حتى إلهي بيان عليهم تدين .. بس كان قلبي بيوجعني على الكويسين منهم إلهي بيتاخدوا في الرجلين بسبب أفعال ناس تانية .. وعشان كده كنت بدافع وبقول البُقين دول .. إن مش كله كده .. وإن الأخلاق البايظة من ناس مظهرها تدنّ مايعبش لا الدين ولا المتدينين .. هما بيعيبوا أنفسهم .. والواجب علينا نبقى مفتحين وموضوعيين أكثر من كده ونفرق بين الناس وبعض..والدين!

أصل أكيد حاجة في منتهي الغباء مثلاً إن الواحد يفكر إن عشان فيه دكاترة مكافهم الأصلي المفروض يبقى الشفخانة يبقى تعامل كل الدكاترة وحش .. أو عشان فيه مهندسين عندهم هواية بُنا بيوت راكمها عفاريت وبتقع من غير ما حد يزقها يبقى نبطل بنى بيوت ..

أنا مش بدافع دفاع أهبل .. أنا فعلاً شايفة ان الناس مش لازم تعامل بعض بالتحامل ده .. عشان الدنيا تبقى ظريفة وقلوبنا تبقى نضيصة.

هل كان في بالي إن أنا حاكون أحد ضحايا مُدعى الدين؟؟

هل كنت أصدق إني بعد فترة حاتعقد أنا كمان من أصحاب الدقون؟

لأ طبعاً مكش يخطر على بالي ..

ولأن دائماً الصدمة بتيجي والواحد مش مدى خيانة .. والواحد مطمئن وعائش على إن معتقداته شيء مسلم بيه .. ولأن غالباً في الزمن ده الثقة آخرتها طعنة في الظهر .. ولأني بطبعي مش بقرأ العلامات كويس .. وعشان حاجات كتير وتفصيل حصلت .. معلش .. قررت إني ما أذكرهاش ،

حصلت الكارثة .. اتصدمت واتكسرت وعلى أثر ده مرضت وعييت وحاولت أخفف نفسي بس منفعش لفترة طويلة .. وابتديت أفوق وأفهم بس لقيت نفسي لوحدي .. مع طفلين ..

ودنيقي اتقلبت .. ما بقاش فاضل ولا ثابت واحد من الثوابت إللي كنت رابطة فيها حياتي .. حتى إيماني اتزعزع .. ولحد النهارده أنا بحمد ربنا انه ما ذهبش مع الريح .. وشوية زعزعه أمر مقدور عليه ..

بس إللي حصل إن تعبي زاد أكثر وفقدت اتزانى تماماً .. وابتدیت أیأس ..
وبعدین کآخر ملجأ قررت أطلب المساعدة وساعدتني أحسن إنسانة شُفتها في
حياتي كلها .. هي طيبة نفسية بس مشاركتها الانسانية ورحابة روحها وذكاء
عقلها وغنى نفسها خلّی الموضوع مش تقليدى زى ما بنشوف في الافلام .. مفیش
شيزلونج ولا فضفضة ولا بلبعة أدوية .. كانت رحلة بحث وتنقيب حقيقية عن
أصول المعاني فيا كإنسانة .. كانت مرحلة تدريب على مهارات شخصية وطريقة
تفكير .. كانت رحلة طويلة مُتعبة دخلتها بكل كياني وشوية شوية ابتدیت أخف
..

كانت معاناة - في اعتقادی - لا بد منها .. حلة تطهير لو صح إني أسميها كده

أكثر معاناتي في رحلة علاجي النفسي كانت اقتناعي بمهاراتي او تمیزی .. إني
أستاهل أخلى بالی من نفسي وأستاهل أبقي بصحة نفسية طيبة وأستاهل أتحب
وأحب وأتقدر من الكون كله مش من شخص ربطت حياتي بحياته .. مكنتش
عارفة أصدق ان ربنا بيعجني قوي قوي ويحب كل الناس من غير لزوم لأى
كتالوجات أو وصفات من صنع بنى آدمین قررروا يفتوا حباً في الفتى لأنهم مش
عارفين يصدقوا إن الانبياء خلصوا خلاص وجه وقت الاخلاص والعمل وتوجيه
النية .. مكنتش عارفة أصدق ان علاقتي بربنا وحيى ليه متوقف على علاقتي بيا
وبالحياة وتقديرى ليها .. كأن الدنيا الكوبرى الوحيد إللي حيوصلنى لرحته .. إني
أعيش حياتي برحة لنفسي ولغيرى .. بروح تساع كل الناس .. بنور شغفي
بالحب كمعني مش كممارسة اختزلت في سرير مترين في مترين ..

حاجات كثير كان لازم أحسها بس رحلة البحث عنها تحت سنين من الصدا
والانغلاق وإنكار إن فيه مشكلة كانت صعبة .. إتولدت من جديد مع كل صفحة
كنت بطويها في الرحلة دى ..

وفتحت باب بيتنا .. ونزلت أشتغل .. مش عشان إثبات الذات وتحقيق
المعرفش ايه .. لأ .. انا كنت بعمل حاجات كثير وانا في البيت محققة لى ده ..
مدونتي وقراءاتي وشهادات كنت بأخدها اونلاين وتربية أولاد زى القمر
وحاجات صغينة كنت بشتغل فيها من وقت للتاني .. أنا فتحت باب بيتي ونزلت
أتعامل وأشتغل في وسط الناس لإني كنت مضطرة نفسياً ومادياً كمان .. أصل
مكنش عندي استعداد احس إني عبء على أى حد .. ولا حتى بابا.. هو أى نعم
كان ثرى بس كرامتي كانت وجعاني على طول .. وأقل ما يجب لازم أعمل أى
حاجة ..

وسبحان مغير القلوب.. بقيت لما اشوف دقون قلبي بيتقبض .. تفكيرى مختلفش
.. عارفة ان مش كل الناس زى بعض .. بس برضة .. كان قلبي بيتقبض!

الدعوة.. داعي، ومدعو ووليمة!

وبعدوا عني الصديقات .. وإللي منهم شجاعة وحاولت تقرب، لقيتني خرابنة
من جوا وبعده نفسي عنها لإني مجروحة من بعدهم .. زهقت مني ..
بعدوا لأني أصبحت مختلفة..مطلقة..

ومكنتش ناقصة إن معنى الدعوة كمان يتشوه..بس الحقيقة إن حتى بعدهم
مأثرش في إقتناعي بالدعوة...مع تحفظاتي على المنهجية من زمان من قبل الدنيا ما
تتغير..

لمدة ثمن سنين كنت عايشه وبحب ومقتعة...بتنفس منهج الدعوة ..
الموضوع كان بسيط: ناس بسيطة..بتحب ربنا أوى والسنة ونفسها المسلمين
يفتكروا أصول دينهم تاني

المرجعية : سنة وسلف صالح
التطبيق: أبسط ما يمكن وبعيد عن التشدد بصفة عامة وبعيد عن تسميع
الآيات والأحاديث وخلاص

المصدر: قرآن ورياض الصالحين
المشايخ : من كل أنحاء العالم...ناس مجتهدة مش علماء غالباً
المنهج: خصص جزء من حياتك للسمع عن الله والإيمان ومن ثم إبلاغ
الآخرين من دائرتك المحيطة بما أحببت مما سمعت

النتيجة المرجوة: إحياء الدين والسنة في حياتنا وإستبدال الهموم المادية
والإنشغال بالدنيا بالإنشغال بالإيمان والآخرة والدعوة...

الأمل: حياة طيبة وجنة الفردوس

الطريقة: زيارات - فيها ضحك وهزار بس بكلام طيب ولطيف.. إكرام-
عزومات على كل ما لذ وطاب ..هدايا رمزية- عطور وبخور وما شابه.. جدعنة -
كل شدة وكل فرح تلاقى ناس جنبك بتحبك مش عايزة منك مصلحة من اى
نوع.. لقاءات اسبوعية.. صحبة.. ونس.. عزوة.. والناس اللي كنت وسطهم كانوا
من اهالى المعادى والمهندسين الوجهاء مادياً وعلمياً وإجتماعياً

الكاش فين؟؟

الكاش في حاجة مش متشافة.. مش ملموسة.. حاجة في القلب

الداعى حيدعو مين للحياة الطيبة المؤمنة اللي هو عايشها؟ حيدعو أهله
وأصحابه وجيرانه ومع الوقت حيتدى مخه يفكر في الدعوة كل ما يتعرف على
حد جديد.. كل ما يشتري حاجة من محل.. كل ما يتعامل أى تعامل.. ومش كل
اللى حيقابلهم ناس عادية من المصريين اللي عايشين وإخلاص دوول.. حيقابل
السكير.. وحيقابل النصاب وحيقابل الصايغ وحيقابل الملحد..

وزمان علمونا ان أصل الدعوة إخلاص القلب.. مش في ان الدعوة تبقى لله
بس.. لأ.. انها تبقى نية قلبية بمشاركة الخير.. مش إزدراء للعاصى والحكم عليه
بالفجور والتعالى عليه.. لأن ساعتها المدعو حيحس إنه بتبصله من وجهة
الأفضليه.. وساعتها حيحصل صد لو اتجمعت مشايخ مصر كلهم مفيش حاجة

حشفكه..محدثش بيسمع لحد هو شايف في عينيه إنه قرغان منه..محدثش بيحب حال واحد هو حاسس منه إنه مزدريه

والفرق ما بين إني اشوف واحدة عريانه تماماً وبعيدة تماماً عن ربنا وأدعوها للحياة الطيبة لأني بحبها ولأني اتخلى لها الخير ولأني شايفه فيها نفسى ولأني حسه برحمه ناحيتها ولأني حاسه بتواضع لله وبتمنى يستخدمنى للخير - وبين إني أحس قد إيه أنا أفضل وأحسن ومستورة وفاهمة وعندى مفتاح سر الجنة وإني أحس بقرف إنما مبيينة صدر ولا رجل وإني أحس بإنها في النار....الفرق في القلب...شعرة وأدق...الفرق بين الخير للخير وشكل الخير في توب إزدراء زى الفرق بين السجق والكاكا لا مؤاخذه

والفرق عند الداعى هو إن الدعوة إنطلاقاً من حب ورحمة وحنية بتملاه هو حب ورحمة وحنية...بتنور قلبه وحياته وروحه...بتقربه من الله تعالى...

إجبار الغير على ذاك أو تلك وفضح معاصيه وتعرية عوراته صدماً له وظناً بأن ده بيعلم..انطلاقاً من إزدراءه ورفضه وكرهه لأنه عاصى..بتربى كبير..غطرسة إيمانية..حَمِيَة جاهلة...والهدف بيضيع أكثر ما هو ضايع والمدعو بينفر أكثر ويبعد أكثر.

الكاتش إن الداعى قلبه حساس جداً وعرضه للعطب لو فقد الشعرة الفاصله بين كره المعصية وكره العاصى..

وعشان كده..دعاة كثير بيعملوا مجهود إنتقائى فى الدعوة على وليمة الحياة الطيبة والجنة..والوليمة عشان مش بتاعتهم أصلاً مش بتبوظ مهمما طال الزمن..دى وليمة الله واعدنا كلنا بيها..مين؟؟ "من أتى الله بقلب سليم" بس..بسيطة وأصعب ما يمكن

خلال التمن سنين ربنا فهمنى الحنة دى..وبعد التمن سنين لما إتغيرت مية مرة
والدنيا بهدلت فيا وأنا بهدلت فيها..عمرى ما نسيت..أحياناً كثير بغلط لأنى نفس
والنفس لو مغلطتش متبقاش آدمية أصلاً..بس عمرى ما نسيت الدعوة...الدعوة
مش لمسجد وصلاة وصوم ونقاب..الدعوة لأى خير حسيت إن ربنا حظه
فينا..الأمانة..الصدق..الإخلاص فى العمل..الحب..العطاء..حب البلد..تربية
عيال..السعى ورا اللى بنحبه..تنمية موهبة..شغل وقت..إستمتاع حتى بأى حاجة
جميلة..إحترام الشغف..أى حاجة..أى حاجة حلوة ومفيدة.

والمدعو..من غير سبوت لايت يعميه..بالمعاملة والكلمة الحلوة والحب..ومش
مهم مين ..إسمه إيه..دينه إيه..جنسيته إيه..لابس ولا مش لابس..يصلى ولا
لأ..يصوم ولا لأ..شريف ولا لأ..ماسك كاس ولا ماسك آيس كريم..بيدخن ولا
صدره نضيف...بيسمع هيفى ميتال ولا مشارى راشد..لأن الحقيقة إن أنا
المدعو..وأنا الداعى..أنا الإنسان..

لأنى كمخلوق عارف حجمة الحقيقى ودوره..أرفض إنى أبقى حاكم..الله هو
الحاكم..أرفض إنى أبقى مُقَمِّم..الله هو القِيم..أرفض إنى أبقى غير عبد من
عباده..بحاول زى غيرى وبغلط وبخجل منه هو بس.

المخلوقات اللى شبهى ملهاش عليا سلطان وأنا ما ليش عليها حكم..لا من
حقى أكشف عوراتها ولا هو خير إنى أفصحها...نظرة إزدراء واحدة تطلع من
عينى تجاه عبد زى ذنب أكبر من كل الكبانر من وجهة نظرى لأنى ساعتها كأنى
بزقه زق لما هو العن.

أكشف المعصية آه..الخيانة آه..النفاق آه..أكره العاصى والمنافق والخاين
وازدريه وأتعالى عليه لأ.

الرحمة اللى ربنا زرعها فى قلبنا لبعض لازم تُستخدم وإلا نبقى بنرفس النعمة.. وعدم إستخدامها سبب كل المصايب اللى فى الدنيا.. و ده.. دون إنتظار لرحمة الناس بيا.. أنا بثق فى رحمة الله بس.. أقدم أنا رحمة.. ما أستنهش.

الدعوة بالحب.. للحب.. حبنا لله.. معرفتنا ليه.. نكسر حاجز الخوف اللى باعدنا عنه.. لأن الخوف طيعى بقدر الرجاء وإلا يبعدنا بعد جداً عنه.. لازم يبقى حبيبنا لأنه يحبنا وإحنا مفطورين على حبه.. حبنا لبعض ورحمتنا على بعض.. أى حاجة قصدها حب بتوصل ولو بعد حين.

وكلنا داعى بلا إستثناء.. وكلنا مدعو بلا إستثناء.. وتظل الوليمة لو إتقدمت صح هى أعظم الولائم.. لانها بتاعة الحياة الطيبة والجنة.. مخلوقات الله.

وفى أى أمر من أمور الدنيا.. فى السياسة.. فى العمل.. مع الأصحاب.. بالتربية.. العلاقات أهم حاجة النية و القلب والحب وبس...

أى منطلق تانى وأى نية تانية هى دعوة على وليمة بايظة غير الوليمة بتاعة اللى خالقنا.. تبقى العزومة على سفرة بقاها سنين متزوقة ومستتية الضيف ومن كتر ما إستنت عشش عليها العنكبوت .

الدعوة على خير ونور وحب.. وإلا..

شُغْلَانَةُ مُلْتَزِمَةٍ

لأ .. مضربتش استريتش لمّيع ورُحت أدور على حياتي القديمة .. ده يبقى
إسمه جنان درامي .. فضلت زى ما أنا .. وإشتغلت في مدرسة أصولها دينية ..
فرحت بالشغلانة لعدة أسباب.. أولاً لأنها جت بسرعة .. ثانياً الزميلات كانوا من
الطف وأفضل الناس إللي شفتهم في حياتي .. وبالرغم من إن معظمهم كانوا
أصغر مني إلا إننا إتصاحبنا بسرعة .. ثالثاً كان نقابي شىء عادى بالنسبة لهم ..

الإنجليزى بتاعى نفعي وبقيت مُدرسة إنجليزى .. قبضت في إيدي أول فلوس
كسبتها في حياتي .. ٤٨١ جنيه .. شعور لا يوصف .. كنت مكسوفة وأنا
بأخذهم .. وفرحانة بنفسي .. وكان نفسي مصرفهمش وأفضل محفظة بيهم
للذكرى بس طبعاً صرفتهم.

بأبا كان بيديني فلوس طبعاً.. وطبعاً ال ٤٨١ جنيه ما كانوش بيكفوني أسبوع
واحد حتى .. بس برضه اسمى بشتغل ومش متتحة ..

كانت المدرسة مقسومة نصين .. نص بنين ونص بنات .. المدرسات في نص
والمدرسين في نص .. يعني فصل بين الجنسيتين .. بس طبعاً مش فصل تام عشان ده
شغل مش مسجد .. وميمنعش برضه وجود نظرات وإعجاب صامت بين النصين
.. وأنا كنت بتفرج على شباب المستقبل وأنا بضحك وأقول .. هي هي الدنيا أياً
كانت البيئة المحيطة ..

الأيام عدت والزّمن ابتدى .. وأهم زنة كانت من بأبا ..

- حبيبة بأبا .. مُرتبك كام؟

- ٦٠٠ جنية بس بعد الخصم بيقوا ٤٨١ جنيه

- انتي بتهزري صح؟

- لا .. دى الحقيقة ..

- يعني بكل العلم بتاعك ومهاراتك دى فى الآخر تاخدى ٤٨١ جنيه؟

- أيوه .. عشان السى فى بتاعى بسيط .. وكل إلمى عملته كان جوه العيلة

.. معنديش خبرة تدينى آلافات .. واحدة بادية عمل بجد وهي عندها ٣٠

سنة .. وبعدين إلمى لقيته اداى بقى عشان كنت محتاجة أعمل حاجة بسرعة.

- ولأ عشان النقاب؟

- ماله النقاب؟

- ما هو الشركات الكبيرة مش بتشغل منقيات ..

- حتى لو بتشغل .. حشتغل إيه وأنا معنديش خبرة؟

- إنتى عارفة إنى عمري ما طلبت حاجة من أصحابى أو معارفى لأنى مبحش

الوسايط أو الخدمات .. بس ممكن أكلم أنكل طلعت يشوفلك حاجة كويسة ..

- حبيبى .. أنا كمان بكره الوسايط والخدمات يا بابا وحابقى مكسوفة ..

خلينى زى ما أنا مؤقتاً لحد ما ربنا يكرم ..

- مش كل حاجة حتمشى بدماعك .. كفاية إنك أصريتى على الطلاق وأنا

كنت رافض ..

- إيه علاقة الطلاق بموضوعنا دلوقتى .. بليز بلاش السيرة دى ..

- له علاقة طبعاً

- أنا مش حافكر حضرتك بأسبابي .. لأني أنا نفسي مش عايزة أفتكرها
- ولا أنا .. بس ده كان إختيارك والمفروض تتحمله عشان الولاد
- ده جواز .. وفاق ... مش حكم بتأييده لازم أكمله .. أنا برضه مش عايزة
أتكلم في الموضوع ده يا بابا معلش .. خلىنا في موضوع الشغل ..
- يبقى تشيلى البافطة إللي حاطاها على وشك دى .. يا بنتى الناس حتخاف
تشغلك .. وانتي شاكلك أصغر من سنك فحتلاقى ميت فرصة هائلة ..
وانا عايشلك النهاردة ومش عايش بكرة ..
- ربنا قادر يرزقنى وأنا زى ما أنا ..
- بلاش تخلف بقى وإسمعى الكلام ..

أين وجهي ؟

وتكررت خناقات بابا .. وأنا أعيط .. وهو يُصر .. وأنا أعيط .. عشان بحب
النقاب وعشان خايقة أشيله .. عشان بقالى ستين مستخبية فيه وخايقة أشيله
وأعامل مع الناس تاني.. عشان البُعد عن الحياة الاجتماعية المفتوحة كان مخلينى
كأنى كنت في شرنقة .. كنت خايقة من الولادة الجديدة ..

وفضل يتخانى .. وفصلت أقاوم .. وبعدين إستسلمت .. مش لحنافه بس ..
بصراحة لأ .. إستسلمت لصوت عقلي إللي يقول إنه النقاب مبقاش مناسب
لحياتي الجديدة .. وإستسلمت لصوت في قلبي بيقوللى إني مبقيتش مُنقبة من جوه
بقالى فترة .. وشيلته .. وأول مره شيلته فيها كان في خروجة مع واحدة صاحبتى
وجوزها .. رجعت محجبة تاني بس لابسة إسود في إسود .. صاحبتى كانت خبرة
في القصة ده وليها تجربة سابقة مشابهه .. كانت فنانة رسم وتصوير وعندها
إحساس على بالبنى آدمين .. صاحبتى ساندتنى ومسكت إيدى

وطمنتنى لأنى كنت مرعوبة من الخطوة دى .. ولحظتها حسيت إني عريانة خالص
.. كان بقالى كتير محستش الهواء وهو بيخبط في وشى .. بقالى كتير محدش بيعرف
إني بضحك إلا لو طَلعت صوت .. بقالى كتير محببة ملامح وشى وهي قرفانة أو
مش عاجبها أو حتى معجبة بحد .. بقالى كتير مش باينة كده ..

وعدت الخروج على خير .. وواجهت الناس .. واجهت حكمهم إني أى كلام
ووحشة ومش مؤمنة حقيقية .. وواجهت الناس إللي فرحت فيا وإتشفت ..

وواجهت الناس إليّ كنت صعبانة عليهم .. بابا علق يومها وقاللي: بس
متشيلش الحجاب مهما حصل ..

الدنيا مبقتش آمنة ولا راكزة .. والدرفيل النائم تحول الى بومة عندها أرق
مُزمن .. لا بتنام صبح ولا ليل .. مبقتش فاهمة أى حاجة قوي ولا مستوعبة الدنيا
إليّ حواليا .. نسيت كتير من إليّ كنت متعلماه .. وبقيت بواقى كذا حد في
بعض..

وعشان تكمل .. بابا توفي بعدها باربعة شهور ..

لما مات بابا لقيتني دخلت دنيا ثانية خالص .. أو بمعنى أصح دنيا تالته ..
صحافة وفنانين وشخصيات عامة .. تركة ومشاكل وورثة وحكايات
واكتشافات..

لقيتني مسئولة عن بابا بعد وفاته .. وملحقتش أحزن عليه أو أستوعب موته ..
كانت تصرفاتي عبارة عن ردود أفعال بمحاول تكون في صالح بابا .. بروح وبآجي
ومتولية الأمور انطلاقاً من فكرة "بابا كان يحب إيه ؟".

معرفتش أحزن .. مقدرتش أستسلم للكسرة الكبيرة إليّ حصلتلي .. وعلى
الرغم من سنى الكبير .. كنت في حالة سذاجة وتوهان مُغلّفين بوش خشب
مصطنع كإني البت الفت الجامدة .. وعشت في الدور .. وصدقته .. وبقيت
جامدة ..

ربنا يخليلى امي واوлады .. بقيت انسانة مسئولة عن ناس ثانية ومحدش
مسئول عني .. ولا حتى من بعيد ..

اليتم إحساس غريب..مش حزن..كنت حاسة بالظبط كأني لابسة عباية ثقيلة
مغطيانى من راسى لرجلى بس فيها فتحة كبيرة في الظهر..ظهرى
عريان..متلج..مكشوف..ضعيف..

كان يعدى اليوم وأنا المرأة الحديدية.. إلى أن أحط راسى على المخدة كل يومين
ثلاثة من كثر التعب... وأنا نص نائمة أمدّ يدي جنبى أمسك الموبايل وأتصل بابا
زى ما أنا متعودة... وقبل ما يقوللى "الرقم المطلوب غير موجود" أستوعبها.. إن
بابا مش موجود.. صار عدم.. وأبكى بحرقه لحد ما أنا..

وأصحى تانى يومى عشان أستبدل إحساسى الرهيب باليتم بإحساس مصطنع
بالقوة على مواجهة "الغابة".. وأبص على وشى فى المראה وأقوللى حاجات تجدد
طاقتى عشان أستجمع غطاء يحمى ظهرى..

وفى يوم ضحككت على نفسى ..

قلت : يعنى عَرَّيت وشى عشان أدوس فى الحياة العملية .. ادينى غرقت فيها
وبالرغم من إن وشى باين.. أنا مش عارفانى.. أنا مش لاقياه!!

خسیت و حسیت

وكما توقع بابا الله يرحمه، جالى شغل هايل بمرتب أهيل .. وتحولت الى سيدة أعمال..وبسرعة .. درست الإدارة وتعلمت ادوات المهنة .. وفضلت جامدة ذات وش خشب وحُطام داخلى فوضوى وعقل يبحاول يكتسب مهارات مع كل شفقة أو كسجين بياخذها .. مستمرة في رحلة العلاج .. بس شوية بركز وشوية بتوه ..

وابتديت أحس .. وابتديت أحس إني مُرّة .. دون وجود حد يقولهالى .. طبعاً دلعتنى بكام طلبة شوينج تاريخية .. وتلَوْن حجابى .. وبقيت شيك يا معلم وآخر منجهة .. ولأ مكنتش بتكلم بيئى في شغلى زى ما أنا واخده راحتى هنا.. في شغلى كان الانجليزى سيد الموقف ..

إديت كل وقى لشغلى .. سييته يحص دمي .. كنت بشتغل قبل مواعيد العمل بكتير وأخلّص بعد مواعيد العمل بكتير .. شغلى كان الحاجة الوحيدة إللى محسسانى إني يتفع أعيش وحاقدر أربى ولادى..

بس بعد الشغل أحياناً كنت باقابل صاحبتى الفنانة وأغرق في التهيس والتبسيء والهزار براحتى .. كنت بحس إن الكلام الشعبى والمناطق الشعبية والناس ولاد البلد أجمل شىء في مصر.. كنت بحس إني أقرب للحس ده من أى حال تاني إتريت عليه أو بتحط فيه ..

يعني أحلى خروجة خرجتها في حياتي كانت مع صاحبتى دى .. أكلنا طعمية مشطشة في إسكندرية وحبسنا بكوبايتين شاي على كراسي خشب مكسرة على الكورنيش .. مش بتفكر خروجات زمان بتاعة مطاعم السبع نجوم لما أفكر في احسن خروجة ..

يمكن واخده الموضوع ده من بابا .. هو كمان مكش بيتبسط في أى حته في العالم قد إنبساطه بقاعدة أصحابه عالقوهة في عابدين ..

بقيت بخرج .. حجابي متناغم مع الدنيا .. محدش بيصلى بإستغراب .. متشافة وعارفة أشوف .. الدنيا إستقبلتنى .. عرفت أفرح أولادى .. وإتعلمت إن الولاد ممكن نعوضهم عن حاجات ناقصاهم مهما كانت .. المهم نبقى مركزين ..

وأنا كنت مركزة أعوضهم .. وكنت مركزة أسعد أمي ..

وده كله كان حاصل وأنا بحاول مبقاش من جوه ملخبطه ومش فاهمة حاجة عني أنا .. مشاعرى إللي هي بتاعتى أنا بس كانت وجعاني .. بجد مطحونة ومش باين لها ملامح .. كأن فيه مقرمة في دماغى مش راضية تسكت .. ووقتها كانت رحلة علاج النفس إللي ابتديتها زمان في أصعب مراحلها ..

طبعاً أخذت نصيبي من ولاد الحلال إللي استغلوا حالتي الضايعة دى .. وبرضه كثير صدقوا إني جامدة وشخصيتى جبارة فقالوا يا فكيك بدرى بدرى ..

وبالظبط زى برنامج عالم الحيوان إللي كان بييجى زمان كل يوم جمعة .. الصيدة من دول تقع بس وتلاقى كله عايز ينهش فيها .. القصة مش قصة رجالة على فكرة .. لأ .. النهش له أنواع .. مادی .. مصالح .. عاطفي ..

هي قُدرة الانسان الفطرية إنه يميز الفريسة ويستغل الفرصة وهو وشطارته بقى .. ياخذ حنة صغيرة .. أو ياخذ حنة كبيرة ..

والغريب في الجريح انه مش بس بيكون بيرف .. كمان بيكون أعمى بإرادته إنه يشوف السكينة وهي بتتن على مهل ومقربة من رقبتة ..

أحياناً كنت بنجح أموه حقيقة إني هشة من جوه وممكن أقع .. فمحدث يعرف يستغلني وأحياناً كنت بفشل فشل زريع في إني اعرف إن الصياد .. صيادا!

بس لأنى كنت بمحاول مبطلش زياراتي للدكتورة .. إتعلمت معاها ازاي أقدر نفسي كفاية بحيث مكنش ابدأ محل افتراس ..

موظفات مصلحة الضرائب

ومرت ثلاث سنين..السنين والواحد بيحكى عنها ببساطة كده كأنه بيوزن
برتقال إحساسها عجيب.. الشهوووور الطوووويلة اللي بتحصل فيها بلااااوى
دى بعد ما بتمر بتبقى عدد.. فقط عدد.. وراحت الشُعْلانة إللي قعدت ثلاث
سنين هرسة نفسي فيها .. راح البُنا والشقا .. راح بيتى التاني ..

راح ليه؟؟

عالم ولاد تبيت .. مش مشكلة .. ربنا بيدى كل واحد على قد نيته .. انا مش
حدعى على حد ولا حنفسن من حد.. إطلاقاً .. كل واحد بياخد نصيبه .. انما
يعني ..

خلاص خلاص مش حاتكلم .. قفلت بقى اهه ..

أصل ولاد الـ ***** عملوا فيا ..

انا سكتَ خلاص .. سَكُتُم بُكُتُم!

المهم راحت الشُعْلانة .. فكرت .. قلت طب يا بت يا عبقرية ما تفتحي
مكتب خاص بلا مديرين وناس مُخها طاقق بلا قرف .. وإتحمست طبعاً حماس
الاقرع في محل البواريك ..

أخذت القرشين إللي كنت محوشاهم وأخذت الخامى بتاعى وعملت ورق
الشركة .. ولما رُحت أعمل بطاقة ضريبية دخلت المصلحة لقيت خير اللهم اجعله

خير .. لقيت جميع موظفات المصلحة مُحجبات .. ما عدا واحدة معلقة صليب في رقبتهأ أد كف إيد يحى شاهين الله يرجه .. كلهم نفس اللوك.. بنطلون واسع .. وبلوزة أكبر من قياسهم بمقاسين على الأقل وإيشارب مشجر فيه ورود عملاقة متغذية من سماء إسرائيلى على أقل تقدير، حيث أن الترتر كان بيتنطور يمينا ويساراً من كُتر اللعلطة إللي على الإيشاربات ..

سبحان الله .. لما بشوف ترتتر بالنهار بتصينى حالة إعياء شديدة وبتدى أزغلل وأصدع ونفسي تُغمُ عليا.

تمالكت نفسي .. وقعدت أملا الطلب بتاع البطاقة .. وقعدنا تقريباً ربع ساعة بنحاول نصلح هجاء إسم الشركة إللي هو أصلاً انجليزى بس في البطاقة لازم يتكتب عربى ..

الموظفة الموقرة خريجة الجامعة تسألنى:

- إسمها إيه الشركة يا مدام
- إنترناشيونال كونسالنتس (مستشارين دوليين)
- طيب (وتكتب على ورقة جانبية .. تقولش امتحان رياضة)
- لأ يا فندم مش كونسالتاس.. دى مش كلمة أصلاً .. إسمها كونسالنتس..
- آه آه آه .. طيب .. أنا كنت سمعاكى غلط ..
- أوكى
- إنترناشيونال كونسلنس

حضرتك متأكدة اننا منقدرش نكتبها بالانجليزى؟

- مينفعش يا مدام .. إفرضى مأمور الضرايب إللي حيحاسبك ميعرفش إنجليزى ..

- طيب وهو إسم الشركة إيه علاقته بحسابى الضريبى .. هو حضراتكوا بتحاسوبنى حسب عدد الحروف الأجنبية إللي فى الإسم ولا حسب نشاطى وربحى؟

- هو ده النظام

- طيب .. ممكن أكتب لحضرتك الإسم ..

- ياريت

(ما كان من الاول طيب)

المهم .. يومها إكتشفت إني شبه الأستاذات بتوع المصلحة بالطبط .. تحت شوية أنا بعد ما سبيت الشغل وقعدت فى البيت وأنا أصلاً مكتتش ناقصة .. فوسعت البلوزات لزوم الرحرحة.

يمكن إشارباتى سادة وبسيطة بس عموماً كده حسيت إني كبرت وفشولت وبقيت مقية.

فقررت أرجع آخد بالى من نفسي .. وده حدث نادر حدوثه فى الثقافة المصرية .. أي نعم فى ستات مانيكانات ومتأنتين .. بس الغالبية لأ .. والرجال بتشتكى .. والستات بتتريق .. ومحدث وقف لحظة يفكر فى السبب الحقيقى .. السبب مش إللي الناس بتقوله إن الست المصرية بعد الجواز بتهمل فى نفسها عشان بتحس إنها خلاص حطت جوزها فى جيها .. لأ .. أعترض .. وأنا هنا بتكلم على عامة الشعب .. أما رواد النادى الصحى بتاع عم جولد فيقعدهوا على جنب ..

الأسباب الحقيقية هي :

*معظم الستات يشتغلن إلى جانب واجبات بيتها وعيالها .. بترجع مُرهقة وبترهق نفسها أكثر في البيت .. وكتر الإرهاق بيخلي الواحد ياكل عشان يعوض ومش بيخلي فيه طاقة لممارسة رياضة منتظمة .. وعدم وجود وقت كافى لتدليل الذات .. والنتيجة .. حالة بدنية مترهلة.

انعدام ثقافة تنظيم الوقت في بلدنا .. المواعيد عندنا غير مواعيد كل الناس في العالم .. تيجى تاخذ ميعاد من حد يقولك .. عالساعة عشرة حذاشر .. ايه ده؟؟ ده معاد .. ده عُمر يا راجل .. ولو منظمتمش وقتى حاعمل كل حاجة ضرورية امتى؟

انعدام الحافز .. الست بتجرب والراجل يطنش لان شعلة الاعجاب وبالتالي الغزل والمداعبة تنتهي عنده بعد الجواز .. بتئس ان اى حاجة حتعملها حتأثر فيه .. خليه كده ولو من باب المجاملة يبين لها انها مأثرة فيه وجاذباه ومجنناه وشوف الست حتبقى قمر ازاي .. بس هو من غير زعل .. مبيعرفش يتعامل مع الست الا اذا كانت صاحبتة!! يا عم ده اول ما يتجوز بينسى اسمها وبيقولها يا ماما .. جتك مَوّ ..

اليأس من النتيجة بسبب انهيار الرجل الدائم بالنافخين والشاذين والمُجَمِّلين صناعياً .. بل بتفكر كثير تعمل عمليات تجميل .. غالباً شفت مش نفخ .. بس العين بصيرة والايدي قصيرة.

انعدام ثقافة الاكل الصحى في مجتمعنا .. هات كده راجل يرجع البيت يلاقى مراته عمالاه حتة لحمه مشوية وخضار سوتيه .. أتحدى لو لمس طبقه ومش بعيد المسهوها في وشها* بما إن الراجل المصرى رقيق بطبعه وأكيد حيغضب عند الست

الوالدة عشان يضرب حلة محشى وكباب حلة .. فالست مطالبة تطبخ ولا حاتى
السيدة .. وكمآن مطالبة متاكلش عشان جسمها يعجب الباشا المفترى .. إيه
الجبروت ده!

*الإعتماد على إن الحجاب يغطى البلاوي اللي تحتة فتلاقى الشعر الأبيض
ضارب في الجدور .. والحالة بتبقى ما يعلم بيها إلا ربنا .. وتهتم ليه .. ما هو
محدث شايفها .. واللى شايفها مطمئنها أصلاً ومركز مع هيفاء ونانسى (ده المحترم
فيهم اللي بيكشفى بالفرجة)

*لو الست محبتش نفسها ومحبتش بحب حد ليها .. حتهم بيها ليه؟! للأسف
الست المصرية متعلمتش إزاي تحب نفسها لنفسها .. لأن هي تستاهل اعتناء ..
لأن هي تستاهل تبقى جميلة في عينين نفسها .. بس ده مش حال الست بس .. ده
حال مجتمع وحال بلد .. لو حس الشعب انه يستاهل الأحسن كان اختاره
وضحى عشانه .. بس .. هو يائس .. والساقية بتدور وخلاص ..

وأخذت بالى من نفسي شوية .. مش جداً .. وابتديت شغلى الجديد .. وفلست
بحمد الله بعد أقل من شهرين .. ورجعت أدور على شغل تاني كموظفة عند ناس
ولاد حلال وزى الفل بس ملقتش!

فضل الحُكم عليا بسبب المظهر سيد الأدلة .. وزى زى غيرى .. كنت إيشارب
متحرك ..

وقابلت إشارات كثير

الناس بتشوف الإشارات مش بتصبر تشوف البنى آدمة إللى لابساه ..
يعني يتشاف الإشارات من دول، يتعرف نص قصة حياة المرمازيل أو المدام
إللى لابساه ..

حاجة شبه قراية الفنجان كده ..

يعني مثلاً ..

آنسة ذات ثلاث إشارات فوق بعض وحجمهم عظيم ومتعدد الطبقات
بتكون : بتشتغل في محل ملابس وإسمها عبير أو حنان وحتتجن وتتجوز .

سيدة لابسة إشارات واصل لحد الركبة على شكل مثلث مربوط من عند
العنق بدبوس ذهبي فيه ألماظة حمراء : إسمها أم سمير أو أم عادل، ربة منزل وعندها
ثلاث عيال وكانت مَرةً منطقتهم أيام الشباب .

بنوتة لابسة بدى اصفر فوقه فستان بحمالات موف قصير وتحتنه بنطلون جيز
رجل الفيل وجازمة كوتشى وإشارات مشجر اصفر في موف : إسمها نسمة ولسه
في الثانوية ومتخافقة مع البوى فريند بتاعها عشان قال إن مِنة شلى احلى واحدة
في مصر .

واحدة شكلها في الخامسة والخمسين بس العمر في البطاقة أربعين بس ..
ولابسة بلوزة بُنى وبنطلون بُنى بس درجة مختلفة وإشارات بيع بسط ملفوف لفة

بسيطة تقليدية ومكشرة ع الصبح: اسمها مَنى او سميرة .. جوزها بروطة وخانقها .. العيال بايظين والواد الصغير تالت مره يعيد ثانوية عامة .. بتشتغل مديرة حسابات في بنك.

واحدة ست منلوطة مش باينلها فئة عُمرية مُحددة ولايسه بنطلون إسود وبلوزة سودا ولولا إن الناس الحشرية بتفضل تسألها لو ماتلها حد كانت لبست جاكيت إسود، لكن جاكيت رمادى أقصر من اللازم ظبط الدنيا ولايسه كمان إيشارب إسود ونضارة شمس ومش حاطة نقطة مكياج في وشها إلا شوية ماسكارا وبتمشى ماشية يظنها البعض تنكة إلا إنها حقاً مشية حذرة عشان رُكبها بتتقح عليها وغالباً بتكعبل بصفة يومية لأن البطلون طويل زيادة وبيتشيك في الكعب : دى بقى غالباً أنا!

الإيشاربات عالم .. من أول الإيشاربات القطن إللي بتؤثر بعد أول غسلة .. للإيشاربات الحرير والشفون الغالية .. للإيشاربات ماركة لوى فويتون و بربرى وإللي طبعاً مش معمولة عشان تغطية الشعر بس إحنا شعب يتحدى المستحيل! والناس بتشوف حتة قماش وخلاص .. مع إني مش شايفه إيه إللي يهم شخص آخر في حتة قماشتي؟؟

أما من ناحية المعتقد .. الأصل إن المعتقد لا يخص إلا صاحبه ..

يعني سواء إللي لابساه ده مقتنعة بيه أو أبوها رزعاها علقه محترمة عشان تلبسه وهي صغيرة أو بيتنها فرضته عليها أو لابساه عشان شعرها مكتكت شويتين مش قادرة تروح للكوافير كثير .. إن شا الله حتى تكون لابساه موضة .. أياً كان السبب .. يفرق مع الناس ليه .. يحكموا عليها ليه .. يحطوها في خانة أقل من خانتهم ليه؟

ناس كثير من إلهي مش معتقده في الحجاب أو معتقده حتى بس برضه مش
لابساه بيظنوا وبيعنوا إنه حجاب للعقل ومستوى متدن وعورة .. بل أنا فاكرة
مرة واحد قاللي جملة في منتهي الغطرسة : مصر تحولت الى بلد خدامات .. كل
واحدة لابسالى إيشارب ونازلة.

المشكلة في المرأة النموذج إلهي الاعلام حاطتها أدامنا ليل نهار .. المرأة
النموذج ذات الشعر الكثيف الطويل (التركب غالباً) والجسم النحيف والفرستان
القصير والأكتاف العارية والماكياج الكثير ..

وحتى المثقفات من غير الحجابات إلهي هما مش بالضرورة بيقوا المرأة النموذج
من ناحية المظهر .. هم برضوا بيدعوا الناس متلبس حجاب ويقتوا إنه عادة
عربية وملوش علاقة بالدين .. متخيلين ان الحجاب يحد الحرية .. او هكذا أعتقد
أنا..

ليه مفيش نظرة للمظهر على قد حجمه .. "مظهر"؟؟

ليه مش مؤمنين بالحرية الشخصية في المظهر والمعتقد اياً كان؟؟

هو حرية شخصية لا تخص أى حد غير الدماغ إلهي محطوط عليها .. أهم
حاجة نبعد عن البوليستر عشان بيوقع الشعر ..

أدينى نهت وعملت إلهي عليا ..

أما أكلمه بقى أغلس عليه شويا ..

مين؟؟

هو .. ما أنا قابلته في يومٍ ما ..

لَمَّا هُوَ حَبَّ الْحَبَابُ..
اقْرَأِ الْحَادِثَةَ!

أنا حتجنن .. مفيش أى حاجة بيننا مشتركة .. نهائى ..

لا شكل حياة ولا معتقدات ولا تصرفات ولا خبرات ولا أى حاجة في أى
حاجة ..

بس حصل إنجذاب وحصلت راحة وتربس المخ وإستكفي بده ..

والغريب إن الصدام بين الحياتين والمقياسين حصل من أول يوم .. والغريب ان
كُرهه للحجاب في حد ذاته مكروهوش فيا .. غالباً لإني مش حابقى محجة في البيت
.. بس هو أعلن وبصراحة - زى كثيرين - إنه مش مقتنع إن حنة القماش دى
مقياس إن الواحدة تبقى كويسة أو لأ وناقشنى بصراحة عن تجارب سابقة مع
ستات محجبات هما في الحقيقة ألعن من الأبالسة .. وأنا كمان ناقشت حقيقة إن
سوء المحجة لا يسىء للحجاب أو لغيرها من المحجبات لأنها فقط بتسيء لنفسها
.. ده منطق سليم وبسيط بس محدش راضى يحطه في باله .. الناس بتستسهل
الافكار المسبقة .. تاني : بيكسلوا يفكروا ومش فارقة معاهم فكرة العدل لأن
أصلاً الآخرين مش فارقين معاهم.

وفي يوم بعد الشغل حصلت حادثة ما وإضطريت أروح القسم .. خلص
الموضوع وروّحنا البيت عندى وفوجئت بيه بيقوللى :

- حاجة كويسة إنك مُحجة

- [illegible]

هايلة...بس للأسف مُحجبة !!

في مدة ستة اشهر بعثت السيرة الذاتية بتاعتي لحوالى رُبعميت شركة .. رُحت
منهم خمس مقابلات .. اتقبلت قبول مبدئى من مديرين الموارد البشرية في أربعة
من المقابلات دى كخطوة أولى وإتقبلت كمان من إثنين من رؤساء مجالس الإدارة
في المقابلات الثانية وكانت مشكلتى المرتب .. كله عايز حد يعمل كتير وياخذ
قليل .. وأنا بصراحة مش برضى .. وقلت لنفسى حاستنى لغاية ما أبقى ع البلاطة
وبعدين أتنازل .. لأن تنازلى دلوقتى ملوش لازمة وحيوجعني أوى .. مدير الموارد
الخامس إللي مقبلنيش كان عشان آخر مرتب ليا كان ثلاث اضعاف إللي هما
عايزين يدفعوه .. أما رؤساء مجلس الإدارة الإثنين إللي مقبلونيش كان للسبب
الآتى وإللي إتكرر في المقابلتين بس بسيناريو مختلف :

- لغتلك هايلة .. خطابات الخبرة بتاعتك دليل واضح على مهارتك ..
دراستك ممتازة.

- ثانك يو يا فندم (ابتسامة فخورة ووش حد رمى عليه كوبايتين عصير
طماطم)

- سؤال أخير .. انتى متجوزة؟

- على وَشَك (ابتسامة كلها أمل)

- مم طيب (الراجل وشه ضَلِم)

- فيه حاجة يا فندم؟

- لا أبداً .. بس أصل فيه مشكلة بسيطة .. بس الغلطة من ال اتش آر مانيجير مش من حضرتك.
- خير يا فندم .. إيه المشكلة؟
- إحنا شغلنا من نوعية خاصة وفيه علاقات عامة كتير وده يستدعى مظهر ملائم للحركة الكثير .. وحجاب حضرتك ممكن ميقاش مناسب.
- إيه علاقة حجابي في العلاقات العامة؟ (الدم إبتدى يغلى في نافوخي)
- له علاقة صدقينى.
- طيب بصرف النظر عن الوظيفة لأنى فاهمة إنهما مش ليا خلاص .. أحب أسأل حضرتك سؤال لو تسمحلنى..
- إتفضلنى ..
- أكيد من أول ما دخلت مكتب حضرتك وإنك شايف إني مُحجبة ..
- إشمعني المشكلة ظهرت فجأة بعد سؤال حضرتك إذا كنت متجوزة او لا؟
(نظرة تتحدى بجأته)
- لأن تفرغك للشغل وساعات عمله الطويلة غير المحددة كان ممكن يخلينى أتغاضى عن موضوع المظهر نظراً لكفاءتك الواضحة (طلع بجد بيج)
- شكرته بفتور ومشيت .. وبعدها بدقائق كنت بلعن نفسي إني مقلتلوش رأيي في إللي قاله .. مقلتلوش إن معني كلامه إنه عايز واحدة إما عانس او مُطلقة .. وإن معني كده إن نسبة الاتنين عليت جداً في مصر .. ومقلتلوش إن ده ازدراء للست وأكيد وراه نوايا مُغرصة .. مقلتلوش إن الدكتوراة إللي متفشخر إنه واخدها من أمريكا مقدرتش تشيل الأكسدة إللي في محنه وإللي محلياه مش قادر يفرق بين

المهارة كموهبة في العمل ومهارة الفاترينات .. مقلتلوش إن مجالات العمل إल्ली بتتطلب عدم وجود حجاب ممكن تبقى مفهومة لو بنتكلم على وظيفة نادلة في بار أو ملهي ليلي مثلاً .. لكن وظيفة مساعد مدير أو رئيس مجلس الإدارة حيبقى من متطلبات عملها تكون مش متجوزة ومش محجة ليه؟؟ .. مقلتلوش إن كلامه مش منطقي ومُهين ويدل على منتهي التحامل والسطحية وعدم إتباع الأصول الإحترافية في العمل وعدم إتباعه لمبدأ تكافؤ الفرص.

ورروحت البيت وأنا حاسه بقهر شديد .. رروحت وأنا بترحم على أيام شُغلى القديم إल्ली كنت فيه لمونة في بلد قرفانة .. كنت فيه محل تقدير الناس حتى المواطنين منهم إल्ली خزوقوني في الآخر .. حتى دول كانوا معترفين ومقدرين مهارتي .. هما بس مشكلتهم كانت غيرة وفرض السيطرة.

مرارة اللقاء وجعتني .. بس شبح إني ملاقيش شغل لايق بخبرتي ومهارتي قلقني على ولادى .. وفضلت قلقانة ..

محدث يقوللى خدى أى مُرَّب والسلام .. أصلى عارفة نفسي .. ححس إن أصحاب العمل بيستغلوني وإني مُنكسرة وإن مفيش عدل .. وححس إني بقيت محتاجة وبتنازل ..

أحاسيس كُلها بالنسبة لى قاتلة ..

أحاسيس تتنافى مع إيماني بالله إنه قادر يرزقنى ..

أحاسيس حتى لو إستحملتها فالشغلانات الرخيصة مش حتكفي أولادى وأنا عائلهم الوحيد ..

حوار... فاصل!

- ألو بيى
- أهلاً حبيبى.. إزيك يا عمى.. وحشتينى يا روحى
- (سكت... سهمت.. فيه حاجة مش مطبوعة.. قلبى مقبوض)
- ألووو.. حبيبى إنتى معايا؟
- أيوة
- إزيك يا قلبى
- أنا كويسة.. إنت إزيك؟
- تمام.. ميسينج يوو جداً
- وأنا كمان.. إنت فىن؟
- أصلى كنت.. عدت على ماهر صاحب معرض العربيات عشان أسأله على حاجة كده حابقى أقولك عليها بعدين.. إقفلى إقفلى أنا جايلك دلوقتى.. بس زحمة.. باى
- قلبي كان ناقص يترهالى منشيت فى الجرنال.. كنت واثقة إنه عامل مصيبة.. لا دى لهجته ولا ده كلامه.. متأكده.. قلبى وقع فى رجلها.. نفسى راح.. والساعة اللى عدت لغاية ما رن جرس الباب عدت كأنها عمى كله..

ودخل قعد..عنيه مش بيتجى فى عينيا..باصص على التليفزيون ومش
بيتكلم..بيولع سيجارة من سيجارة..

طول عمرى مبخافش من المواجهة..أى نعم مكنتش عارفة أنا حواجهه بيايه
بالظبط بس كان لازم أتكلم..

- ممكن تجى البلكونة شوية...عايزة أتكلم معاك

- (بضحكة متوترة) وإشمعنا البلكونة؟

- يعنى...عشان ماما والولاد ميسمعوناش..

- أوك

ولع سيجارة تانى وجه ورايا البلكونة..مقعدش على الكرسي..فضل واقف
يفرج على الشارع..

- إنت عملت إيه النهارده؟

- ما أنا قلتلك

- بص..إنت عارفنى ..بص..أنا عارفة وواثقة ومتأكدته إنك عامل
عاملة..قوللى..إحنا متعاهدين على الصراحة

- آآآآ..الخزعلات بتاعتك بقى..إنتى عايزة تتخانقنى وخلاص..مقريفة
وعايزة تطلعيه عليا..يا بنتى مش كده..مش طالبيه نكد..

- بقولك واثقة ومتأكدته..حتكذب؟؟ حتلاوع؟؟ حتهاجم وتاخدى
بالصوت؟؟ مش مستاهلة..قوللى ولو مش عايز تقوللى قول وأنا ححترم
ده..بس كذب وتطلعنى مجنونة لآ!!

- يووه

دخل جوه وسابى..فضل يتفرج على التلفزيون..رجل على رجل ويهز رجله
بعصبية..وسجاير سجاير..بعدين وقف..

- تعالى البلكونة

- حاضر

ودخلنا البلكونة..ومن غير ما يبصلى..

- حقولك..لأنك بنت لدينا وعارفة..مش عارف بقى إنتى مشيتى ورايا ولا
إيه..حقول وأخلص..

- أوك

- لقيت شريحة تلفون قديمة عندى..حطيتها فى عدة عشان أجربها لسه
شغالة ولا لأ لقيت التلفون رنّ..طلعت واحدة صاحبتى من زمان..إسمها
إنجى..كانت عايشة فى أمريكا بقاها سنتين ولسه راجعة مصر
فكلمتنى..قالتنى نتقابل ناخذ درينك..وقابلتها..وبس..

- قابلتها فىن؟

- فى مكان فيه درينكس..

- إنت قصدك درينك يعنى خره؟؟؟؟

- لأ...بيرة بس..

الدنيا لفت يه..مسكت فى سور البلكونة..سواد..قدام عينيا بس سواد..الإجابة
قتلتنى..بس فضلت حاسه إن القصة فيها كذب..غير الحجة الهيلة بتاعة الشريحة
طبعاً..

- قابلتها وشربتوا فىن؟؟

- قلتك في مكان في مصر الجديدة.. لو أعرف إنك حتعرفيه كنت قلتك
إسمه

- لأ.. مرحتوش بار..

- (يا نفعال وبصوت عالي كأن هو اللي مسك عليا غلطة) شوفتي يبقى إنتي
بتراقبيني.. طيب متقولي إنك عارفة إنها كانت في شقتي..

الدنيا لقت بيا أكثر.. غصة.. سكينه في القلب.. نار في العروق.. نجيب داخلي من
غير ولا دمعة.. غليان وبراكين وحزن في الأعصاب.. دخلت من البلكونة.. كنت
محتاجه أقعد

بعيد عنه.. كنت مسهمة.. بفكر أعمل إيه في المصيبة اللي كنت شغوفة إني أسمعها
زى ما الفَرَاشات بتبقى شغوفة بالرقص جنب النار.. حاولت أهدا.. حاولت أركز
في إحساسى الحقيقى من غير توهان الحب وجروح الكرامة..
دخل ورايا..

- حتفضلى ساكنة؟؟

- لأ.. بفكر..

- بتفكرى في إيه (صوته كان كله قلق وترقب)

- بفكر أنا عايزة إيه بالظبط..

- ها.. عايزة إيه بالظبط؟

- مش عارفة عايزة إيه.. بس عارفة مش عايزة إيه؟

- إيه؟

- مش عايزة أبقي مراتك! خد بعضك وإتكل على الله.. ربنا ينتقم منك!

خاصمت القلوب..

- وخاصمت القلوب..خاصمت نفسي..خاصمت الدنيا أعلنت
تعي..يأسى..خنقتى...
- هل أنا محبكاها؟
- هل أنا على حق؟
- هل أنا وحشة؟
- هل أنا عجزت؟
- هل أنا حافضل مرهقة ومهمومة طول عمرى؟
- هل أنا مصعبه الدنيا عليا؟
- هل أنا فعلاً مش عملية؟
- هل أنا متمسكة بترب مش توي؟
- هل أنا ملخبطة؟
- مجروحة...متشلفطة؟
- خاصمت القلوب...خاصمت القلوب..
- وصااحت بس ولادى وأمى ورغبى الملح للشفل...وحطيت فيهم كل
طاقى..

حقي، وعقلي وكرامتي

كنت كل يوم الصبح بأفتح مواقع التوظيف على النت وأبعت للفرص المناسبة
ليا .. وفي يوم لقيت اعلان مطلوب سكرتيرة .. بقراه عادى للعلم بالشىء لقيت
نص الإعلان الآتى :

سكرتيرة

خبرة سنتين

جميلة

مظهر ممتاز

مرتب : ٥٠٠٠ - ٧٠٠٠ جنيه

ملحوظة : يرجى إرسال صورة حديثة والا لن نلتفت لطلبكم .. ولا

للمحجبات!

الباشا إالى عايز موظفة مواصفاتھا إنما جميلة وخبرھا يدوبك يعنى صغنة فى السن
وشغلانتھا سكرتيرة يعنى عمل مش داخل فى الناحية الإنتاجية بشركته ومرتبھا
كبير كده .. الباشا ده عايزھا لشغل ولا حاجة تانية؟؟

أفهم إنه يطلب مظهر لائق .. بس جميلة دى من متطلبات العمل؟؟

ولا للمحجبات ده بُناء على إيه؟؟

هو عايز موظفة ولا إيه بالظبط؟؟

ومقدرتش أمسك نفسي .. كنت محتاجة أفرغ غضبي وكمان كنت محتاجة
أبقى إيجابية.. كتبت للجهة المعلنة الرسالة الآتية:

"أنا لست سكرتيرة وغير مهتمة بالوظيفة المُعلن عنها ولكن، أنا أرفض وأنا
ضد إشتراط جهات العمل لفتيات غير مُحجبات .. كما إني ضد إشتراط فتيات
محجبات .. تعلمت إن المهارة والذكاء والخبرة والدقة والعلم هم المتطلبات
الأساسية في أي موظف .. أنا أرفض هذا الإشتراط لأنه بنظري عنصرى .. تماماً
مثل حجب وظائف بسبب الدين واللون والجنسية والإتجاه السياسى .. أرى انكم
قد أظهرتم إنعدام تام للإحترافية في عملكم وأرى أن ما جاء بالإعلان إهانة لآدمية
سيدات فضليات ممكن أن يَكُن ذوات مهارة تعينكم على النجاح في العمل ..
وأرى أن في طلبكم إزدراء لكيان المرأة وقدراتها العقلية .. وأرى أن مثل هذه
الطلبات غير المنطقية والاعتماد على أدوات اخرى غير المهارة في العمل هي
الأسباب الرئيسية لتدنى مستوى الأعمال بمصر .. وأنا - بسببكم - سأعمل
جاهدة على نشر الوعى اللازم لوقف إنتهاكات لآدميتنا من نوعية حجب
الوظائف عن : المحجبات، الملتحجن، المسيحين، كبار السن، حاملى الجنسيات
العربية، ذوى الأصول السودانية، قصار القامة، ثقيلى الوزن وذوى الإعاقات..
وغیرها من اسباب الحَجَب المقيتة التى لن تتسبب إلا في زيادة القهر والفقر
والتخلف في بلدنا .. والأهم هو نشر الوعى اللازم عند الفتيات المحجبات - على
سبيل المثال - حتى لا يتأصل بداخلهن أن ما تطلبونه شىء طبيعى .. وحتى لا
يتأصل بداخلهن أنهن لن يُحققن الا نجاحاً محدوداً وفي أماكن محدودة ولأغراضٍ
محدودة .. وحتى لا يتأصل بداخلهن أنهن يستحقن الأقل وان خبراتهن وعلمهن

وقدراتهن بلا قيمة .. وحتى لا يتخلين عن قناعاتهن بسبب الحاجة للعمل .. أو
الضغط الإجتماعي .. وهذا وعد مني .. ياذن الله .. "
كان رد فعل إنفعالي وعاطفي.

المطلوب إيه؟ الست الحلوة .. الست المتحررة .. الست المُلَفَتة .. طيب ما
ممكن المحجة تبقى كل ده بس بطريقتها..بصرف النظر عن كيفية تطبيق الحاجات
دى ..

مفيش الست الأمينة؟ الست الشاطرة؟ الست الملتزمة؟ الست المُرِحة نفسياً؟
الست المستولة؟ الدقيقة..الماهرة..الخبرة؟

يعني غاية رجل الأعمال صاحب الشركة إن يبقى حواليه ستات حلوين
دلوعين حتى في شغله .. وبعدين تحصل مشاكل والشغل ييوظ وعائلات تنهد
ويمكن أحياناً توصل للقتل زى ما بنسمع .. أصل مصيبة البشر هي شهوهم للمال
والسلطة والجنس .. سواء راجل أو ست .. بس بما إن المال بيقع في إيد الراجل
أسرع وأكثر .. فشهوة تكملة المثلث المرعب ده بتبقى عند الراجل أكثر.

الست الحلوة المُحجة يبقوا عايزينها تبقى حلوة أكثر وتدير رؤوس الرجال ..
تخيل معايا مشهد من أفلام زمان : سيلويت ست عاملة شعرها تسريحة جريتا
جاربو وماسكة كاس وتنفخ دخان السيجارة عالياً فييجي كام واحد جرى حاطين
فازلين وبشنبات رفيعة دنيئة ولا بسين سموكج يلتفوا حواليتها بشغف ..

واللي مش جمال وشها زاعق ومُحجة يقولوها : وانتي ناقصة؟ يا بنتي جسمك حلو
بيبنى المواهب .. فتضرب بنطلون استريتش اسود وبدى مُرَصَع وتخط روج أحمر
ماركة "واكلة عَيْل" وسبعة كيلو آى لاينر وتزل على مدينة نصر أرض الأكشن.

طيب مانعامل كل الناس حلو وحسب مميزاتهم الشخصية ونسيهم يختاورا حياتهم براحتهم من غير ضغطنا النفسي عليهم بأحكامنا المسبقة وتحاملنا ومن غير ضغط مادی ومحاولة قولبتهم في قالب مش بتاعهم أصلاً .. إللي عايز يلبس يلبس وإللي عايز يقلع يقلع .. الحرية للجميع والحكم لله .. وبس الله!

إللي مزعلنى إن المحجبات محطوطين في هامش معين خصوصاً في بعض المجالات، باستثناء أساتذة الجامعة إللي فلتوا من حنة الحكم حسب المظهر ده وسيدات الاعمال إللي بيشتغلوا بفلوسهم وبمزاجهم ..

أول وزيرة مصرية مُحجبة .. كانت قُريب .. ومش مُحجبة قوي يعني..بونيهات وحركات..

مثلاً، أكبر جهاز مؤثر في دولتنا هو التلفزيون .. والناس إللي بتطلع فيه تدلو بدلوها أهم مين يآثر في رجل الشارع البسيط ..

ممكن أعرف ليه مفيش إعلامية واحدة في التلفزيون المصرى مُحجبة؟ أى نعم بعد الثورة شفتاهم بس يعني..مش كلهم مؤثرين بصراحة..

طيب لما ربنا فتحها على التلفزيون المصرى وبقي يستقبل مظاهر الدين عادى..ما يعينوا ناس جديدة على مستوى ثقافى ومهارى عالى..مش يمكن يطلع عندها رأي ومؤثرة زيها زي الإعلاميين الرجال اللامعين؟

مش أحسن ما بيبقى معظمهم - مش كلهم طبعاً لأن فيه نماذج هائلة - مجرد ديكور ضارب شعره أصفر ولبسه مليون خَرَج النجف .. مجرد إكسسوار للأخ الإعلامى الرجل وبتبقى قاعدة في نقاشات مُهمة بلا رأي ولا تأثير ولا كاريزما .. قاعدة مُستمعة بس أو دورها إنها تُعلن عن الفقرة الفنية؟ خافين من اعلامية

مُحجبة لتبقى دعوة للحجاب؟ لأ متخافوش .. ما هي مصر خلاص بقت معظمها
مُحجبات .. سواء حجاب حقيقى أو غير حقيقى ..

يمكن بعد الثورة الواقع ده يتغير..بيحاولوا يغيروه .. بس رؤية الناس برضه
محكومة بنقص تقدير للحرية الشخصية زايد عن الحد ..

سواء كان حريقى إني ألبس حجاب أو ألقع حجاب أو حتى ألبس
بلياتشو..حرية .. كل واحد حر .. وكل واحد حيشيل شيلته قدام ربنا يوم
القيامة .. ومش عشان شيلتى ظاهرة للناس يقرفونى ..

وطبعاً لو مارست حريقى فى إني أشيل الحجاب حلاقى ميت ألف نعل إترموا عليا
وغالباً من نفس الناس اللي هاجمت حجابى..زى ما الناس بتعمل فى أى مثلة تشيله
أو تحطه...بيبقى حدث..بتبقى مصيبة..

الفنانة الفلانية إتحمجت ، الجرايد تكتب والقنوات تحجبها وتبقى البنية فُرجة!

والفنانة الفلانية شالت الحجاب ، بسرعة نفس الجرايد ونفس القنوات تلتهمها
والجمهور يلعن سلسفيل اللي جابوها..

من يوم ما إتحمجت وصدمت أبويا وأهللى والبيته إللى أنا عايشة فيها بإختيار
بسيط مارست فيه حق من حقوقى وأنا بصارع قوة الأحكام المُسبقة .. كتير بغلبها
وكتير بتغلبنى ..

كتير بتضعفنى ومن كتر تعبى بقول طب ما أستسهل وبلاش صراعات أنا مش
ناقصة ..

كتير بأضايق إن بيتصلى من فوق على إني مش لذيدة ومش روشة ومش
شيك ومنفعش فى كذا أو كذا .. وكتير بيقى نفسى أحكى للناس حكايتى أو

أحاول أقنعهم يبقوا فير ويعاملوني على أساس أنا كويسة ولأ، مش على أساس بعمل شعري فين .. كثير بتأثر من الشراسة السلبية بتاعة مجتمع ربط الدين والحريات الشخصية بأحزاب سياسية ملهاش أى علاقة بينا ولا إحنا بنطبق فكرها ..

وكل ما أقع وأزهق وأتعب وأقول على إيه وجع القلب ما الحياة حتبقى سهلة لو نحيث .. يتحرك جوايا شعور حقيقي بقيمة الحرية وقيمة حقي في إني أمارسها ..

حُريتى في تطبيق تعليمات ديني الخاصة بالمظهر حسب مُعتقدى وحسب ميلى القلبي تجاه ده. الضغط الاجتماعى إللي بحس بيه مراهن على استسلامى ومش راضى هو يستسلم ويسينى في حالى .. ويا عالم حصمد لحد امتى ..

خصوصاً إني إنسانة.. امرأة.. من طبيعتى حب الظهور ومن طبيعتى برضه إني بتعب ...

رسالة إلى تاج راسي..

بحبك

مع إنك مغيرنى ... بس بحبك

مع إنك طوق حوالين رقبتى

ولجام حوالين دماغى

بس بحبك

بستخبي فيك

بدارى جنانى بيك

لا فنى بأمان وحفاظة

وبحك

أحياناً بزهدك ...

بزهدك علشان أشتري عيون الناس

قبول الناس

بزهدك

وبتحرر منك

عشان أتنفس

عشان أحس إننى والسما واحد

عشان البحر يفرقنى فيه

عشان أحس إن الهوا سكن شعرى وطار بيه

برجعلك بقلب

زى ما بزهدك بقلب

برجعلك وأعطيك تسامحنى

عشان بحبك

ده مش تخلى

ده مش تُكران

ده مش كُفر بيبك

ده مش عصيان

ده...مش عارفة ده إيه

انا انسانة...زى ما بحبك

ساعات بقلب عليك

أو...أو بس هو الهوا...والمية...والسما

وشمس حامية ترجع فى عروقى الحياة

وعيون الناس اللى بتحضنى من غيرك

بتلهى بيهم عنك

بس برجعلك

علشان حبيتك

أوي... حبيت سترك...حدودك...

إستكانة عفارىتى بيك...

بتحببنى وطاير جنبى؟

مسامحنى وحاسس بحبى؟

طب إفتكرلى حاجة حلوة

يوم ما إتشتمت بيك

يوم ما إتهجرت لىك

يوم ما إتهمشت عشان جريت عليك

حياة أبوك ما تزعل منى

عشان ساعات بزدرىك

إفرح

إفرح إنى مش بنافقك

إفرح إنى بصدق بحبك...وقت ما بحبك

ووقت الخنقة بعفيك

من لومى وزلتى

ع الأقل إنت فى حياتى أمانة

مش بخونك ..أنا كنت بستسمحك

بستسمحك أنساك

وأعيش من غيرك

بستسمحك وببعد من غير ما أسيبك

شايف رجوعى بحب

كأن الأجازة من غيرك كانت وحشة

كأن من غيرك أنا وحدى فى وحشة

والله بحبك

إقبلنى كما أنا

حريتى فى حبك غنى

حريتى إنى إخترتك..بقلبى وبعتلى وبايدى أنا

الخيانة مش البُعاد

الخيانة أبقي لازقك فيا وكرهاك

وأنا حباك

تلاتة بالله العظيم حباك

وشريك

وعايزاك

إيشاربي يا إيشاربي...

سامحنى لو غلطت... شعري كله فداك

الفهرس

٥	الإهداء
٩	جيز مقطع
١٥	الزلال
٢١	هنا وإنتهاء
٢٧	عريس في سبيل الله
٣٣	التاج والإبتسامة
٣٧	مُحجبة في لاس فيجاس
٤٥	لا يأكل الذئب من الشاه إلا القاصية
٥١	عين واحدة
٥٩	منك لله يا دكتورة
٦٥	مفیش أفهم من كده

٧١	بِجِبِ الدَّقُون...مَبْحِشِ الدَّقُون
٧٩	الدَّعْوَةُ...دَاعَى وَمَدْعُو وَوَلِيمَةُ!
٨٧	شُعْلَانَةُ مُلْتَزِمَةٍ
٩٣	أَيْنَ وَجْهِي
٩٩	خَسِيتَ وَحَسِيتَ
١٠٥	مُوظَّفَاتُ مَصْلَحَةِ الضَّرَائِبِ
١١٣	وَقَابِلَتِ إِشَارَاتٍ كَثِيرَ
١١٩	لَمَّا هُوَ حَبَّ الْحِجَابِ...اقْرَأِ الْحَادِثَةَ!
١٢٣	هَائِلَةٌ...بِئْسَ لِلْأَسَفِ مُحْجِبَةٌ
١٢٩	حَوَارٍ...فَاصِل!
١٣٥	خَاصَمَتِ الْقُلُوبَ..
١٣٩	حَقَّى وَعَقْلَى وَكَرَامَتَى
١٤٧	رِسَالَةٌ إِلَى تَاجِ رَاسِي..

